

Vanden levene ons Heren

editie W.H. Beuken

bron

‘Vanden levene ons heren’ In: Instituut voor Nederlandse Lexicologie (samenstelling en redactie), *Cd-rom Middelnederlands*. Sdu Uitgevers/Standaard Uitgeverij, Den Haag/Antwerpen 1998.

Zie voor verantwoording: http://www.dbnl.org/tekst/_lev001leve01_01/colofon.htm

© 2002 dbnl



Van[d]en leuene ons Heren

Vanden leuene ons Heren [0001-1033]

- [D]icke ghesciet [da]t [een groet scat]
 Besloten leit in een cleyn [vat]
 Dese [boe]c dat es een cleyn v[at]
 Die vroetheit binnen dats .j. groet scat
 5 Meneghe rime soe es ghemaec[ct]
 Die ter zielen luttel smaect
 Van battalien ende van minnen
 Van meneghen die wi niet kinnen
 Van roelande ende van oliuiere
 10 Van alexandre ende van ogiere
 Van walewaine ende van sire macht
 Hoe hi weder ieghen sine viande vacht
 Van digenen hoe hi siin lijf
 Tormente omme een scone wijf
 15 Van pyramuse hoe hi siin leuen
 Omme minne verloes dats al gescreuen
 Kinder dus varende ende ledichede
 Dijt lesen lachteren hem daer mede
 Sonden mesprisen ende dorperhede
 20 Om horen truffe ende ledichede
 Dire sen an leyt eest wijf eest man
 Hi es sot daer es niet vroetheit an
 Dit bliuet ende dit es al bleuen
 Dit es boerde al eest gescreuen
 25 Dit es meer d[a]n niet dit bliuet al
 Neemt roeken an dat ic seggen sal
 Dats prijs recht ende houeschede
 Sen te legghene an waerhede
 Dats wat daer dese boec af begint
 30 Soe leert alle moeder ende kint
 Dat es vanden heylighen kerste
 Die ons gheue sine verste
 Dat wy beteren onse sonden
 Dat wy soete ende sachte [v]onden

- 35 [Ons her]en gheborte [ende] sine d[oet]
 E[nde di]e passie ende [di]e [n]oot
 [Wi]llic met due[t]s[cen] [waerd]en seggen
 Ende mine ghe[d]achte [ane] [leg]g[en]
 Al lesen papen in lati[ne]
- 40 Sine gheborte ende de passie s[ine]
 Nochtan leec volc ne can niet w[ale]
 Verstaen wel die latijnsche tale
 Bedie willicse in diesche leeren
 Den volke dat wel sal eeren
- 45 Onsen here van hemelrike
 Diet pensen wet dat manlike
 Hoort die bliscap van paradijs
 Hen es inder werelt pape so wijs
 Die beschriuen mochte ochte ver[tell]en
- 50 Die bliscap gods ende sire [g]e[se]llen
 Daer nes seer no daer nes ro[uwe]
 Daer es emmer wa[er]heit ende t[rouwe]
 Daer es emmer bliscap ende s[anc]
 Daer es altoes sulken gheclanc
- 55 Violetten lielen rosen ende acoley[e]n
 Bloeyen daer altoes als die in [meye]
 Altoes botten daer d[ie r]osen
 Dits waer wat mach d[aer nosen]
 Die daer sijn sijn emmer bl[ide]
- 60 Si singhen hogheleke haer g[etide]
 Si sing[h]en minl[ike a]ldus
 Sa[nct]us sanctus sanctus domi[nus]
 Die daer sijn sijn emmer boude
 Hen ne deert no hitte no coud[e]
- 65 Daer es mey ende somer emmermeer
 Daer en es siecheit no strijt no seer
 Waert waer dat wi alle kinden
 Die bliscap die daer es sonder inde
 Die ledichede soude wi l[a]ten
- 70 Van deser werelt ende haten
 Alle die clerke die nv sijn

- [Die] scriuen connen die[sch oft lat]ijn
 [N]e moch[t]en niet ghescriue[n die d]uecht
 Van [den] paradyse ende die iuech[t]
- 75 [Die heyligen] hadden dit lijf onwert
 Si sijn nv daer hen niet en deert
 Sie lieten kinder ende wijf
 Doer gode offerden sie haer lijf
 Men brietse men soet haer leede
- 80 Hier cochten sie langhe bliscap mede
 Men trac die tande wt haren monde
 [H]ier omme storuen sie sonder sonde
 Soe dat daer na volgden die darne
 Men trac haer borste men trac haer arme
- 85 Men deden lachter ende wee
 Men voer met hen als met enen vee
 [I]n derre manieren in derre wijs
 Cochten sie dat paradijs
 Elke onser neme hier exempel an
- 90 Pape leec wijf ende man
 Versie wi ons so verre te voren
 Dat wi niet ne sijn techterst verloren
 Waken wi soe in goeden dinghen
 Dat wi metten inghelen singhen
- 95 Sanctus sanctus dominus
 Dat gheue ons sanctus spiritus
- SElen wy dragen bont ende grau
 Ende ons sieren als enen pau
 Ende die arme sal siin in selc bedwanc
- 100 Dat hi ne sal hebben spel no sanc
 Sal die rike hebben al dat hi geert
 Ende cume weten wat hem deert
 Ende darne kaytijf ende verract
 Dorstich hongherich ende nact
- 105 Dat .j. weent ende dander lacht
 Deen weeldich ende dander onmacht
 Dat es onwet dat ne sit niet wel
 Dat es een onghedeelt spel

Van eerden sijn wi all[e] comen
 110 Wi[e]s mochten wi ons dan [beroem]en
 Ter eerden selen wi alle varen
 Wel hem die vaert ter ho[gh]er scaren
 Doe houeschede ende swijch stille
 Hoert wat desen boec segghen wille
 115 Die dit pensde tierst ende screef dit werc
 God gheue hem raste hi was cler

Omme dat wi alle siin in sonden
 Hebbic ghesocht ende hebbe vonden
 Die gheborte van enen man
 120 Die alle sonden vergheuen can
 Alsoe god vanden hemel onse vader
 Sine creaturen sach algader
 Ter hellen varen die hi ghemaecte
 Datse die helle alg[a]der sacte
 125 Als hi dit sach hi riep gabriel
 Hore na my ende make di snel
 Ene boedscap willic laden dy
 Die ic di segge nv hore na my
 Ic maecte den eersten man adame
 130 Ende deerste wijf yve was haer name
 Met enen appel braken si mijn gebot
 Sie waenden beide wesen god
 Als ict wiste si waren ondaen
 Uten paradyse werpicse saen
 135 Daer ne can hen ghehulpen seluer no gout
 Het becoept menich sonder scout
 Sie waren ries si waren sot
 Dat sie braken mijn ghebot
 Sint dat dat was ne was noeyt man
 140 Alsoe verre als ict verkinnen can
 No moeyses no abraham
 Die binnen den paradyse quam
 Noch steet die porte al beloken
 Van paradyse ende oec besloten
 145 Alle die siin gheboren tote noch

- T[er o]nreynder hellen ginc haer woch
 Be[di]e [d]at ic die beteren can
 Willic werden ander man
 Gabriel antwerde doet uwen wille
 150 Al v volc heeft die onreyne hille
 Vare dan mijn inghel gabriel
 Doet mine boetscap ende wes snel
 Ter stat die hetet nazareth
 Oppenbaert daer ene nuwe wet
 155 Ene joncfrouwe saltu vinden da[er]
 Die maria heet ic seggu waer
 Quedse inden name mijn
 Segt ic wille van hare geboren sijn
 Dus salic mine creaturen
 160 Quiten daer si es inder hellen suere
 Gabriel hi ne lette niet
 Hi dede dat hem sijn meester hiet
 Hi voer ter stat van nazareth
 Hi seide al dat hem was geset
 165 Vant hi marien ten venstren staen
 Vant hise achter straten gaen
 Vant hise in plaetsen vant hise int spel
 Neen hi niet die maecht pensde al el
 Hi vantse in eenre verholene stat
 170 Daer sie allene besloten in sat
 Daer sie allene daghelike
 Aenbede gode van hemelrike
 Voer marien stont die bode
 Gabriel. hi quam van gode
 175 Hi seide god houde v maria maecht
 Sijt in hoghen ende niet en claecht
 Maria voer alle vrouwen vercoren
 Een kint sal werden van .v. geboren
 Het es die bloeme gi sijt die doren
 180 Het sal quiten die siin verloren
 Het sal wesen de here dijn

- Ihesus es de name sijn
 Als die ioncfrouwe maria dat vernam
 Haer wonderde wanen dat groeten quam
- 185 Si wert veruaert sere ontdaen
 Te haer seluen quam si weder saen
 Maria antwerde en can versien
 In welker wijs dat mochte gescien
 Dat ene maghet soude draghen kint
- 190 Die noeyt ne was van manne bekint
 Minen magedom heb ic ghelouet
 Den hoghen god hier af es voghet
 Inne hoerde noeyt in boeke lesen
 In welker wijs het mochte wesen
- 195 Hoe mochte gescien dat. scone bode
 Ic hebt ghelouet den hogen gode
 Dat ic met manne niet ne sal mesdoen
 Dies my gewaghen si mesdoen
 Gabriel antwerde maecht hoert na my
- 200 Die mogende god hi es by dy
 Sijn heilighe gheest sal in di sijn
 Dus sal comen de sone sijn
 Maria wes hoghelijc ende blide
 Voer alle wijf ghebenedide
- 205 Dat seggic dat saltu sien
 Du sult maecht bliuen het sal [gescien]
 Maria antwerde scone bode
 Ic weet wel dattu coms van gode
 Dattu segs dat moete ges[ci]en
- 210 Dat ic maecht bliue dat moe[ti]c sien
 Tote nv was hi die vader mij[n]
 Voert meer benic die moeder sijn
 Heylich vader heylich god
 Doet van my al diin gebod
- 215 Gabriel die bode scone
 Voer op weder ten hoghen trone
 Die heilighe gheest quam in hare saen
 Maria bleef met kinde beuaen
 Maria dancte dicke gode
- 220 Sie hielt wel alle sijn gebode

- Maria seit nv willic saen
 Te lizabetten mire nichten gaen
 Hare vertellen mine bliscap
 Die my god sende ende sine boetscap
 225 Alse te elizabetten quam
 Die comst hen beiden wel bequam
 Maria seide nichte god houde dy
 Ic bringhe den heyligen kerst in my
 Elizabeth antwerde sijt willecome
 230 Dit en seggic niet doer eneghen roeme
 Tkint binnen my dat keert hem nv
 Als ghi hier comt dat seggic .v.
 Dat kint dat was baptista johan
 Dien elizabeth droech van haren man
 235 Vroech bekinde hi sinen god
 Tilic dede hi sijn ghebod
 Daer maria ende elizabeth
 Waren daer die heylige kerst met
 Deen en haet den anderen niet
 240 Sie seiden dat hen was gesciet
 Als maria hadde ghedaen
 Te nazareth ghinc sie saen
 Alsie quam te haerre stat
 Hare wert emmer in lanc so bat
 245 Hare lichame wies het wert mare
 Si was verwaert het wert mare
 Want wijf die kint sonder man drecht
 Dat mense steende was ghesecht
 Daer omme was marien dan
 250 Ioseph gegeuen tenen man
 Dat sie te sekerre soude gaen
 Metten kinde dat si hadde beuaen
 Omme dat sie ginc sonder lachter
 De maecht droech tkint vele te sachter
 255 Louet gode die wel versiet
 Alle dinc eer sie ghesciet
 Ioseph wert serich ende verveert
 Ene sake es die hi herde geert

- Van wien sijn wijf maria draecht
 260 Die hi suver wiste ende maecht
 Hoe si mochte draghen kint
 Die noeyt ne was met manne bekint
 Hi wildese laten stillekine
 Dat waren die gedachten sine
 265 Maer god onse here diet al versiet
 Als hi dat pensde hine saen beriet
 Hi riep sinen inghel gabriel
 Doet noch mine boetscap wel
 Daer neder te iosephe vare saen
 270 Mindere den rouwe die hi heeft ontfaen
 Gabriel dede siin ghebod
 Hine dorst laten want hi was god
 Te iosephe quam hi hier te dale
 Ende sprac te hem dit was sine tale
 275 Ic ben te dy ghesent van gode
 Ioseph seit hi ic ben bode
 Hets gabriel dat gi hier hort
 Merct wat ic v segghe vort
 Uwen rouwe ende v groet seer
 280 Willic menderen in lanc so meer
 Den rouwe dien gi draecht so groot
 Sal meneghen ledeghen vander doot
 Hets waer dat maria kint draghet
 Nochtan sal si emmer bliuen maghet
 285 Propheten hebben dit ghelesen
 Tkint sal noch coninc wesen
 Moeyses ysaias ezechiel
 Screuen in hare boeke wel
 Dat een kint soude sijn gheboren
 290 Dat quiten soude die sijn verloren
 Ioseph het was ter goedertijt
 Hoghelijc ende blide sijt
 Dat maria dijn wijf was vercoren
 Dat die dracht van hare sal sijn geboren
 295 Met goeder herten eere dijn wijf
 Voert meer als dijns selfs lijf

- Onderhorich soe wes hare
 Wies haer behoeft neemt grote ware
 God heeft van siere moeder di geset
- 300 Tachterwaerne dat es die wet
 Daer wijf met kinde gheet bevaen
 Dat hare wille saen si ghedaen
 Gabriel niet meer hi voer inwech
 Ten hoghen trone dat was sijn wech
- 305 Ioseph bleef marien goet
 Hondertwerf custe hi haren voet
 Saen nakede die negende maent
 Dat maria gheligghen waent
 Die keyser augustus tenen tide
- 310 Daer hi sat hoghelijc ende blide
 Hi dat in sinen rade vant
 Dat hi soude gaderen al sijn lant
 Hi ontboot wijf ende man
 Alsoe verre alsoe hi ghereyken can
- 315 Te bethlehem binnen diere poort
 Al tfolc dat te sinen rike hoort
 Dat was sijn sin ende sijn ghepens
 Dat sie gouden haren chens
 Ende oec diere comen niet en woude
- 320 Hi gaue .ij. marc van roden goude
 Ioseph ende maria worden veruaert
 Ende ginghen te bethleem waert
 Ioseph was out ende maria cranc
 Hen docht die wech herde lanc
- 325 Op enen esel maria reet
 Ioseph al te voet gheet
 Alsoe joseph reet maria ginc
 Die heyliche ghest was inden rinc
 Alsie te bethleem quamen in die stat
- 330 Si waren beyde moede ende mat
 Si hadden beyde al een ghepens
 Si ghingen ledeghen haren chens

- Tfolc gaderde die perse wert groe[t].
 Daer was diere wijn ende broet
- 335 Die herberghen diere. groot waest verdoen
 Wat heetti armen lieden doen
 Ioseph ende maria sweghen stille
 Sine hadden niet al haren wille
 Si riepen anden hoghen god
- 340 Dat hise beriede ende sijn ghebod
 Sine wilden niet trecken ter tauernen
 Noch ten husen met posternen
 Dat harer dracht yet mochte deeren
 Uter persen dat sie gheeren
- 345 Inde plaetse stont een huseken cranc
 Dat ne was no wijt no lanc
 Het was ontdect het was ontlat
 Dat huseken hadde wel menich gat
 Daer ne was no weech no venstre no dore
- 350 Inde side no achter no vore
 Daer ne woende noeyt niemen in
 Hagheldet snuwet vilet nat
 Diere was in hi hadts te bat
 Dit palaeys hadde kerst vercoren
- 355 Daer hi binnen woude sijn gheboren
 Ioseph scuulde daer dien seluen nacht
 Maria die soete wile wacht
 Want sie ghinc groot op haren dach
 In dat huus snachs sie ghelach
- 360 No met rouwen no met seere
 Ghelach onse vrouwe van onsen here
 Maer dat ne gesciede no sint no eer
 Daer wijf gelach daer ne was groet seer
 Marien vele bat te moede was
- 365 Dan daer die scijnt in een claer gelas
 Marien was alsoe te moede
 Als dat hem rust een die es moede
 Dat ware onrecht hadse gehadt onsachte
 Daer si onsen here van hemel brachte
- 370 Elc voghel heeft sinen nest
 Beyde wilt ende tam daer hi in rest

- Maer de godsonne de heylighe kerst
 Ne weet [n]iet waer hi des eerst nachts rest
 Ioseph tsau[.]ns hadde gesacht
- 375 Eene crebbe sinen esel ende ghemact
 Daer wert gheboren in dat suete kint
 Soe soete gheborte no eer no sint
 Daert in de crebbe geboren lach
 Die esel vernam ende versach
- 380 Dat het was ene saleghe dracht
 Dat daer gheboren wert inder nacht
 Die esel liet daer siin eten staen
 Ende viel in knieghebede saen
 By bethleem inder seluer nacht
- 385 Waren herden daer elc siin vee wacht
 Die soe grote clærheyt alle sien
 Dat sie van vruchten alle wilden vlien
 Soe grote clærheit elc om hem sach
 Dat elc van vare in onmacht lach
- 390 Vreese ende wonder elken man
 Tot datse die inghel vertroesten quam
 Die inghel seide ne vruchte niet
 U allen es vele wel ghesciet
 Hoghelijc weest ende lacht
- 395 Bliscap es gheboren in deser nacht
 Te bethleem binnen der stat
 Daer loept alle ne sijt niet lat
 In ene crebbe leit daer gheboren
 Een kint. ne waert ghi waert verloren
- 400 By hem en es no smerte no galle
 Dat aenbeet daer loept alle
 Alle die sijn ende nv leuen
 Selen noch voer dat kint beuen
 Het heeft oec in sire ghewelt
- 405 Al die werelt ende al dat wilt
 Het es coninc van hemelrike
 Het weet de ghedachte van yegelike
 Het es god gheweldich here
 Dien kinde doet alle lof ende ere
- 410 Dit sprac een inghel een geselschap

Songhen inden hemel grote bliscap
 Die inghele songen ene stemme also
 Gloria in exelsis deo
 Te bethleem liepen die herden
 415 Hoghelijc blide ende met werden
 Sie vonden tkint siere moeder met
 Tkint weende het dede al die wet
 Sie custen die crebbe daer tkint in lach
 Elc der herden soe hi eerst mach
 420 Van groter bliscap weenden si alle
 Sie aenbeden tkint sonder galle
 Sie keerden saen te haren vee
 Hen was saechte hen was niet wee
 Sie saghen tkint te haren wille
 425 Dat breken sal donreyne hille
 Sine helens niet si maectent maer
 Dat tkint gheboren waer daer
 Dat noch soude hebben sinen wille
 Van al den ghenen die waren in die hille
 430 Merct hier grote oetmoedichede
 Die onse here in siere gheborten dede
 Dat hi den herden openbaerde wel
 Sine gheboorte eer yemen el

MAria lach daer soete ende saechte
 435 xl. daghe ende xl. nachte
 Sine wilde niet op staen ieghen wet
 Vi. weken liggende was gheset
 Alsi ghelegghen hadde haren termt
 Haer kint ghebaet ende ghewermt
 440 Vanden lande die wet si gheert
 Si droech haer kint ten tempel wert
 Dat was recht dat was die wet
 In dien tide den lande gheset
 Daer een rike vrouwe ter kerken ginc
 445 Dat sie offerde scaep of also goede dinc
 Dat was gheset den armen alle
 Twee tordelduuen sonder galle
 Onse bere ne merct niet wat men gheeft
 Maer hi merct hoe vele men heeft
 450 Maria was oetmoedich niet rike

- Sie dede na darne een ghelike
 Sie offerde .ij. duuen met haren kinde
 Die doetmoedeghe god wel kinde
 Binnen der stat was een out man
 455 Symeon inden tempel dan
 Hi was al blent hi ne sach twint
 Maer hem ghesciede dat hi sach sint
 Hi bat ende vleude daghelike
 Gode onsen here van hemelrike
 460 Dat hi nemmer inder noet
 Ware. dat hi moeste sien sijn doet
 Hine moeste sien marien kint
 Met sinen oghen ende bekint
 Hi ontfinc dat kint in sinen arme
 465 Hi seyde kint mijns ontfaerme
 Dat dy moeten sien mijn oghen
 Ende bekinnen oec dy moghen
 Hi droech tkint ten outare wert
 Hi sach te hant dat hi gert
 470 Hi seide kint gheweldich god
 Nu steruic alst es dijn ghebot
 Ic bebbe ghesien te minen wille
 Die nv rouen sal de lede hille
 Ende du maria moeder blide
 475 Du sals noch sien in enen tide
 Van desen kinde maecht ende joncfrouwe
 Wel groet seer ende bitteren rouwe

 DRie coninge woenden in orient
 Deen den anderen wel ghehent
 480 Ane sterren sie alle wijs
 Als noeyt clerc binnen parijs
 Eenwerf in ere auonstont
 Een clare sterre anden hemel stont
 Die noeyt eer was ghesien
 485 Sie wonderden wat mochte gescien
 Die sterre die daer so scone sceen

- Sie pensden wat sie m[oc]ht[e] meen
 Sie lasen op ende n[edere]
 Ter sterren si keerden wedere
 490 Een coninc vant ende las
 Wat dat scone boekiin was
 Hi ghinc te sinen ghesellen
 Wat die sterre meende vertellen
 Hi seide ghesellen weset blide
 495 Die sterre die daer licht claer ende wide
 Sie wijst ons tkint dat es geboren
 Dat quiten sal die sijn verloren
 Een ghepens hadden sie saen
 Sie wouden tkint hersoeken gaen
 500 Sie namen scat ende staf
 God selue hen de ghedachte gaf
 Sine letten niet sie gingen wech
 Die sterre wijsden haren wech
 Die sterre leiddese al daer sie gaen
 505 By bethleem quamen sie saen
 Also inden lande quamen daer
 Sie ne heeldens niet si maectent maer
 Si ne hadden ghene vrocht
 Si seiden de zake diese daer hadde brocht
 510 Si vraegden waer tkint geboren w[as]
 Daer haer gheselle dboeken aue las
 Een kint so ware int lant geboren
 Dat quiten soude die siin verloren
 Dat soude hebben te sinen wille
 515 Al dese werelt ende de hille

- HErodes was coninc in diere stont
 Gierrech ende wreet fel als .j. hont
 Van dien kinde hoerde hi niemare
 Hi wert in vruchte ende in vare
 520 Hi ontriet dat hijt mochte sien
 Alst lichte mochte gescien
 Dat hijt soude hebben in sijn hant
 Al sijn volc ende al sijn lant
 Hi ontboet die coninge alle drie

- 525 [Die peel]grime waren. te hem quamen sie
 Hi s[eide] heren willecome sijt
 Dat ic vraghe ghi my belijt
 Ouer al dit lant so maecti mare
 Dat een kint es en weet ware
- 530 Gheboren. dat coninc sal sijn
 Segt waer ende hebt de hulde mijn
 Sie antwerden here ne belgt v niet
 Hets gheboren het es ghesciet
 Tkint sal noch hebben in sine hant
- 535 Al dese werelt ende al .v. lant
 Als herodes vernam dese tale
 Hem was wee hi geliet hem wale
 Hi seide ghi heren dese boedscap
 Heeft my toe bracht grote bliscap
- 540 Miin herte es clarre dan .j. gelas
 Blider hogheliker dant noeyt was
 Om tkint dat nuwellinge es geboren
 Ic hebt ghemint ic hebt vercoren
 So blide benic heren al te hant
- 545 Inne liete niet om al mijn lant
 Inne soude tkint soeken al te voet
 Ende hem offeren haue ende goet
 Maer ghi heren selt alle drie saen
 Tierst dit kint besoecken gaen
- 550 Tkint dat coninc sal wesen noch
 Ghi sijt ghereet ende op uwen woch
 Ende als ghi vonden hebt dat kint
 Dat gi soe vleuet ende mint
 Ghi selt keeren ouer my
- 555 Ende segghen waert gheboren sy
 Sie ne saghen in hem niet sijn boeshede
 No sine ghedachte no sine felhede
 Si seiden here dit dunct ons goet
 Dat gy segt oft gijt voldoet
- 560 SI namen orlof si gingen saen
 Si sagen die sterre voer lien staen

- Si droeghen offerande si waren bout
 Mirre wieroec ende gout
 Sie daden dachuaert alle drie sachte
 565 Elc die clare sterre wachte
 Daer si alle drie bleuen vernacht
 Die sterre stont al dien nacht
 Waest vroech waest spade waest middach
 Elc die sterre claer scinen sach
 570 Si quamen die sterre ghinc voert
 Tote bethleem in die poert
 Alsoe die sterre daer quam si stont al stille
 Sie wisten wat sie meynen wille
 Sie ghingen int huus daer die sterre op stont
 575 Si vonden enen saleghen vont
 Marien ende haer lieue kint
 Dat si ghesocht hadden ende gemint
 Elc ontploec doen siin vat
 Ende offerden daer enen scat
 580 Mirre wieroec ende gout
 Si aenbedden tkint menichfout
 Dat kint was god ende here
 Si weenden van bliscapen sere
 Dat gout betekent gheweldicheit
 585 Ende dat wieroec sijn godlijcheit
 Die myrre meende sijn menschelijchede
 Elc wel blide siin offerande dede
 Als die offerande was gh[ed]jaen
 Si wilden te lande keeren saen
 590 Si namen orlof ant suete kint
 Ende aen marien diet hadde gemint
 Si gingen wech doen seiden die heren
 Ouer herodesse moeten wi keren
 Gaen wi hem seggen onse vaert
 595 Ende houde wi redene ende onse waert
 Hi groette ons wale hi nes niet f[e]l
 Make wine blide soe doe wi wel
 Gaen wi ghesellen te hem dats recht
 Ne ga wire niet wi hebbens plecht
 600 Segge wi hem waert es gheboren
 Tkint hi seide hi hadt vercoren

- Hine liet noch niet om al sijn goet
 Hine soudt hersoeken al te voet
 Kere wi te hem. hijs een goet man
 605 Si seiden gherne gawi dan
 Alsi gaen souden van hen was ghehoert
 Een inghel seide ne gaet niet voert
 Ouer herodesse niet en gaet
 Hi peinst boesheit ende quaet
 610 Wisti die boesheit die hi dinct
 Ghi liet den wech ende een anderen ginct
 Ouer herodesse ne keert niet
 Sine boedscap scuet ende vliet
 Sie seiden alle drie .v. wil ghesciet
 615 Wy ne weten smans gedachte niet
 Sie keerden al een andren woch
 Herodesse ne spraken si niet noch
 Louet gode die soe wel versiet
 Alle dinc eer sie ghesciet

 620 HErodes die was fel ende wreet
 Dat die coninghe merden was hem leet
 Alse die coninghe merden ouer tijt
 Dies hadde hi harde groten nijt
 Hi pensde op hi pensde te dale
 625 Hem was wee ende niet wale
 Hi verwoedde hi wert ontdaen
 Dat hem die coninghe waren ontgaen
 Die hem souden hebben bracht
 Boedscap van dien kinde die hi wacht
 630 Hoe hijt mochte verslaen
 Ende andere felheit peinsde hi saen
 Hi pensde in sinen fellen sin
 Dat hi van twee jaren ofte min
 Alle die kinder soude doen vaen
 635 Die waren in sijn rike ende doen slaen
 In sinen fellen sin hi dit dinct
 Mochte hi verslaen marien kint
 Dat coninc soude siin in sijn lant

- Dat het soude bliuen in sijn hant
 640 Sot ghepens soe hadde die man
 Gyerich. wreet. fel. ende tyr[a]n
 Die marien sone wilde verslaen
 Sonder welken niet ne ware gedaen
- GOd van hemele diet al versiet
 645 Dacht alle euele eert gesciet
 Sende sinen inghel al met nachte
 Daer joseph sliep soete ende sachte
 Dinghel seide joseph slaepstu vrient
 Die gode hefs soe wel gedient
- 650 My sent te dy de alweldege god
 Hoer na my doe sijn gebod
 Herodes die coninc wreet ende fel
 Penst ene sake no goet no wel
 Hi penst om niet ende dinct
- 655 Te verslane marien kint
 Hi heeft gehoert papen lesen
 Vanden kinde dat noch soude wesen
 Coninc ende here ouer al sijn lant
 Hier omme dit quaet gepens hi vant
- 660 Alle weghe neemt dat zoete kint
 Ende siere moeder diet heeft gemint
 Vliet tegypten ende scuwet dat lant
 Dat v niet en ghereike herodes hant
 Dat die dief herodes si doot
- 665 Doet dat ic segge het wille got
 Die heylighe inghel ne seide meer
 Hi voer danen hi was comen eer
 Ioseph pensde in sine ghedachte
 Dat hi hoerde in diere nachte
- 670 Dat pensde joseph in sinen moet
 Dat daer was die inghel goet
 Ioseph pensde in sinen sinne
 Du ne heefs ander ors dan dijn eselinne
 Nem tkint ende sire moeder met
- 675 Hise beide op deselinne set
 Ioseph tote marien seide
 Wine hebben breidel no gereyde

- Doen wi dbeste dat wi moghen
 Want hen ne mach niet wel doghen
 680 Maria nam haer lieue kint
 In haren scoet dat si hadde gemint
 Ioseph ginc hi dede sine machte
 Sie ruunden dlant te middernachte
 Si en letten niet sie voeren wech
 685 Sie scuden alden rechten wech
 Sie voeren crompt si daden wel
 Dat si nie en gemoetten herodes den fel
 Al dat si vten lande vlien
 Sie ontraden al dat si horen ende sien
 690 Tot dat si quamen int verre lant
 Tegypten daer se god selue sant

 die duvel wacht nacht ende dach
 Hoe hi elken bedriegen mach
 Hine begaf herodesse niet
 695 Den coninc hi dede dat hi hem riet
 Hi ontboet sine felle knapen
 Die in siin rike saten
 Hi dede smeden ende maken
 Elken tyran een scarp wapen
 700 Pyken kniue coluen ende swert
 Hi seide gaet te bethleem wert
 Binnen der stat ende al omtrent
 So waer ghi die kinder vent
 Die twee jaer hebben ofte min
 705 Wel soe merct in vwen sin
 Dat moetti doen die kinder vaet
 Die kinder alle te steen doot slaet
 Om .j. kint dat ic hebbe vercoren
 Dat nieuwelinghe te bethleem es geboren
 710 Ic ontrade dat het coninc mochte sijn
 Doet dit ende hebt die hulde mijn
 Si antwerden sine dorstent laten
 In siin rike sie alle saten
 Here dit selen wy doen oft ghijt gebiet
 715 Al waert meerre dinc dat gy ons hiet
 Si namen wapen ende sweert

- Si gingen te bethleem wert
 Al omtrent ende binnen der port
 Also verre als sijn rike hort
 720 Si mercten wel in haren sin
 Kinder van twee jaren ofte min
 Daer tkint by siere moeder lach
 Noeyt man soe groten iammer en sach
 Si namen haer sweert haer scerpe knijf
 725 Si namen hen haer ionghe lijf
 Daer tkint soech siere moeder borst
 Doerden hongher dorden dorst
 Si trockense af onsuerlike
 Si doeddense vele iammerlike
 730 Also sijn swert trac herodes die fel
 Tkint loech ende waende dat waer spel
 Daer tkint sach blicken tscarpe swert
 Tkint loech ten mordenare wert
 Sie versloegen der kinder in derre wijs
 735 Ach aerme hoe lettelt es die prijs
 Daer starc man toghet selken sin
 Op tkint van ij. jaren ofte min
 Soe groten iammer ne sach nie man
 No sint no eer so daer was dan
 740 Daer die moeder sach hare vrucht
 Verslaen. so ne dorste niet geuen enen su[cht]
 De kinder ne mochten spreken no gaen
 Die herodes dede verslaen
 Met rechte heten si onnoseline
 745 Die so doechden der doot pine
 Int bloet daerse herodes dede verslaen
 Worden sie kerstijn ghedaen
 Met rechte hebbense ons heren hulde
 Die om hem doot bleuen sonder sculde
 750 Si ne waren noyt besmet met wiue
 Kinder van soe ionghen liue
 Hondertdusent verloren daer haer leuen
 Ende .xl. dit es ghescreuen
 God die es goet wrekere

- 755 Al nes hi niet vele sprekere
Hi merct wel in sinen brief
Die ondaet die dede herodes die dief
Anxt ende seer. ende vernoey. ende rouwe
Gedogede siin lijf om sine ontrouwe
- 760 Nochtan ne wilde hi sceden niet
Vanden duuel diet hem riet
Siin lijf dat wert venijns al wl
Hi wert verwoet hi wert al dul
Sine lichame wlet ende al sijn lijf
- 765 Hem te verslane hi neemt enen knijf
Sijn adem wert bitter emmermeer
Als galle dat was lettelt seer
Dit leuen haddi toter doot
Met rechte doechde hi dese noot
- 770 Binnen hem ne was bliscap no spel
Hi was emmer rouwich ende fel
Soe groot torment ne sach nie man
Soe siin lijf gedoechde dan
Selc wile hi riep selc wile hi swech
- 775 Siin hoet hurti dicke an de wech
Selc wile hi stont selc wile hi sat
Quaet te doene ne wert hi nemmer sat
Singhen bornen als een vier
Hi was gruwelec als een dier
- 780 Hine mochte eten no drinken niet
Siin herte soet hem ende briet
Alse herodes vernam ende sach
Dat naken soude siin indach
Sine cnapen in sijn rike hi sant
- 785 Te manene die hoechste in sijn lant
Sonder redene ende sonder sake
Vinc hi sine man donreyne drake
Hi beneet verde ende haette recht
Hine wilde niet steruen sonder gevecht
- 790 Binnen dien dat dus soude gescien

God die duecht ende euel can vers[i]en
 Gaf hem de gadoot daer hi sat
 Grote bliscap was om dat
 Als hi dus was doot donreyne dief
 795 Meneghen waest bequame ende lief
 Alsoe also lesen clerke
 Hi hadde loen na sine werke
 Daer en was rouwich no wijf no man
 Daer sie groeuen dien fellen man
 800 Maer blide dat hi was verloren
 Archelaus wert coninc vercoren
 Herodes was int quade volmaect
 Archelaus in dogeden volmaect
 Maria was noch met haren kinde
 805 Dat si met harer herten minde
 In egypten in dat allendeghe lant
 Daerse gabriel hadde ghesant
 Tere stont hoerde josph soete ende sachte
 Eene stemme die hi hoepte ende wachte
 810 Dat was gabriel die bode scone
 Dien hem god sende vanden trone
 Gabriel seide josph doet mijn gebod
 Te di sent my dalweldeghe god
 Ghereide dy kere weder in dijn lant
 815 Dune darfs niet ontsien herodes hant
 Hore van gode dese boedscap
 Die al den lande es grote bliscap
 Herodes es doot gods viant
 Die al siin volc verslant
 820 Sijn volc es blide het heeft recht
 Nu ne saelt hebben strijt no gevecht
 Met rechte es bliscap in sijn lant
 Dat hi doot es die vinc ende bant
 Ioseph keerde te lande saen
 825 De ghene die gods sone wilden verslaen
 Ic segghe di hi ne slaet nemmermeer
 Hi es in tormente dats lettelt seer
 Alsoe dinghel dit hadde geseit

- Ioseph ontwecket al daer hi leyt
 830 Dat en was niet wonder hi wert blide
 Want hi vernam marien lide
 Hi gereide hem met bliden sinne
 Ioseph brinct voert siin eselinne
 Maria reet met haren kinde
 835 In haren aerm dat si seere minde
 Si porden van egypten sachte
 Met claren daghe ende niet met nachte
 Si namen orlof an hare vrient
 Diese gegroet hadden ende ghedient
 840 Sie voeren wech als sie moede waren
 Sie rusten hem al daer si waren
 So wat ioseph ende maria dede
 Die gods sone was emmer mede
 Den wech dien si hadden crompt gegaen
 845 Dien lieten si nu al stille staen
 Met verden ende al ongevaen
 Quamen sie te nazareth saen
 Alsoe sie thuis quamen daer
 Het wert in die stat den volke maer
 850 Menich hietse willecome siin
 Men brachte hen broet ende wiin
 Sie hielden beide stillekine wet
 Die de godsoene hen hadde geset
 Al was ioseph marien man
 855 Hi en hadde van hare noyt scout nochtan
 Sie haetten rijcheit roem ende prijs
 Die elken verret tparadijs
 Dat en was niet wonder si waren vroet
 Haer gheselschap was herde goet
 860 Sat maria ghincse ochte stoet
 Sie custe dicke haers kindes voet
 Daer sijt inden weghe leidde ofte nam
 Soe lanc soe meer tkint haer bequam
 Alst kint weende haer was onsachte
 865 Sie sweghet minlike soete ende sachte

- Alst kint hadde hongher ofte dorst
 Sie gaf hem haer ghebenedide borst
 Sine cleder waren altoes wit
 Nieuwe gedweghen groet recht was dit
 870 Siin bat ne was no heet no cout
 Met rechte was tkint sire moeder hout
 Maria herde wel dies wachte
 Dat sine wieghe was scone ende sachte
 At sie dranc sie al dat sie dede
 875 Haer oghen volgden den kinde mede
 Groete vrienſcap was marien met
 Haren kinde dat was die wet
 Si seide dicke kint heb lof ende ere
 Dat kint was siere moeder here
 880 Alst kint groet was dat mochte gaen
 Het en was niet wonder liet wies seer saen
 Het ginc spelen het dede kinschede
 Maria was hem emmer mede
 Daert metten kindren spelen ginc
 885 Ne gheen soe scone was inden rinc
 Als sine kinschede was vergaen
 Dat hem sijn moeder hiet was ghedaen
 Hi hadde .ij. jaer hine scaemdem niet
 Hi dede dat hem siin moeder hiet
 890 Hi ginc om borne ende nam den pot
 Deten te makene dit dede god
 Hi diende sire moeder sonder daengier
 Hi haelde hout hi maecte tvier
 Hi ne was ouermoedich no fier
 895 Sine grote duecht merct alle hier
 Hine ginc nie wt sire moeder doren
 Hin hadde orlof ghesocht te voren
 Tkint het hadde goeden sede
 Tilic het dede oetmoedichede
 900 Hier ane souden kinder leeren
 Si souden vader ende moeder eeren
 God hi was gheweldich here

- Nochtan dede hi siere moeder ere
 Hi was god het was groet recht
 905 Hi haette strijt ende ghevecht
 Hi minde trouwe waerheit ende verde
 Hier was tkint der werelt herde
 Hi was oemoedich hi en was niet bout
 Hi hadde onwert seluer ende gout
 910 Binnen hem en was gene ouerdaet
 Maer mate trouwe ende raet
 Hi conste fransoeys dietsch ende latijn
 Ende alle talen die nv sijn
 Sine duecht en gheseidic nemmermeer
 915 Sijn genoet en was no sint no eer
 Wat hi doen soude hi wist saen
 Al dat hi pensde het was gedaen
 Alle die papen die nv sijn
 Die scriuen connen int latijn
 920 Si en mochten niet scriuen die duecht
 Die onse here hadde in sire iuecht

- ALse god in sijn dertich iaer ginc
 Hoert hier een saleghe dinc
 Hi brachte op ene nuwe wet
 925 Die noch ons allen es gheset
 Dats doepsele ende kerstinhede
 Dat was een die salichste sede
 Die noyt eer noch wert vercoren
 Want en waert niet wy bleuen verloren
 930 Onse here quam tot baptisten johan
 Dien hi minde voer alle man
 Hi seide ic wille ende mane
 Dattu my doeps in de flume iordane
 Ihan van bliscapen weende
 935 Hi hadde wonder wat hi meende
 Hi stoet van vruchte en beeft
 Ihan onsen here antwerde gheeft
 Ic ben v. knecht ghy sijt mijn here
 Hoe mochtic .v. dan doen dese ere
 940 Onse here jhanne antworde gheeft
 Alsoe als dauid gescreuen heeft

- Ihan ic ben gheboren om dat ic wille
 Breken rouen donreyne hille
 Ic wille my doepen om dat ic sal
 945 Selue tvolc behouden al
 Dies my wille wernen hi es sot
 Voer al die werelt ga mijn gebot
 Ihan doept my ic hebt vercoren
 Ic segt di het en sal niemen sijn geboren
 950 Hine si ghedoept inden name mijn
 Hi en sal ewelijc in die helle sijn
 Ians doepsele sal maken vri
 Elken die in sduuels dienste si
 Bedie doepe my al benic god
 955 Ende veruulle miin gebod

 sEnte jhan nam onsen here
 Hi dede sijn gebod dat was sijn ere
 Inde flume van joerdane hine leide alrerst
 Dus doekte jan den heiligen kerst
 960 Als onse here kerstyn was gedaen
 Hi viel in kniegebede saen
 Daer hi lach hi weende tranen
 Ionghe ende oude houder hem ane
 Daer hi weende ende lach
 965 Al tvolc dat daer was hoerde ende sach
 Eene witte duue vliegghen op hem al daer
 Dat was die heilege geest ouer
 Die witte duue sanc een stemme aldus
 Hic est meus dilectus filius
 970 Dat meint. hier es die sone die ic minne
 Hi es vercoren in minen sinne
 Desen ghehoert hoert sine tale
 Die siin gebot doet hi doet wale
 Die witte duue si en seide nemeer
 975 Sie voer denen si was comen eer
 Onse here stont op al daer hi lach
 Dit was in enen disendach
 Sander daechs hi ne lette niet
 Onse here die weet al dat gesciet
 980 Hi trac besiden in ene woestine

- Met hem was die moeder sine
 Viertich daghe ende viertich nachte
 Vaste onse here te dier tijt sachte
 Dat hi ne beet no ats no drancs
 985 Dat was siin wille dat was sijns dancs
 Alsoe die xl. daghe waren leden dan
 Soe hongherde hem want hi was man
 De duuel als hi den hongher sach
 Wilde hine bedrieghen al dat hi mach
 990 Die duuel achter onsen here staet
 Hi seide man du does een arm gelaet
 Ochte du god best so make broet
 Van desen stenen dijn hongher es groet
 Ocht du groten hongher heefs
 995 Make desen steen broet daer du by leefs
 Onse here den duuel antworde gheeft
 Also als die boec gescreuen heeft
 Niet allene met brode leeft die man
 Die duuel antwerde waer mede dan
 1000 God seide aet ende dranc sal bliuen saen
 Maer mine waert en sal niet vergaen
 Hoert wonder wies onse here gehinct
 Den duuel die dus op hem dinct
 Hi nam onsen here hi voerdene woghe
 1005 Op enen tor droech hine hoghe
 God was hoghe de duuel te dale
 Die duuel seide dese tale
 Bestu god dat salic zien
 Valstu dine sal dan niet messcien
 1010 Bestu god so late di vallen
 Blijfstu gesont du hefs ons allen
 Late dy vallen het en es maer spel
 Dine inghele selen di onthouden wel
 Man doetstu dat ic segghe dy
 1015 Tfolc sal dy minnen ende haten my
 Waerstu god du daets dat ic di segge
 So scone tale ic voer dy legge

- Maer ic weet wel dattu lieges
 Dune does maer. dattu tfolc bedrieges
 1020 God antwerde vele zoete
 Den duuel diene dus tierst begroete
 Ic ben dijn here du best mijn knecht
 Du en saels my niet proeuen dats recht
 Du en saels niet proeuen dinen god
 1025 Maer vleien ende doen sijn gebod
 Als du dit penses du waers sot
 Dattu souts proeuen dinen god
 Vare van my ic heet di saen
 Werde te nieute het was ghedaen
 1030 Merct hier grote oetmoedichede
 Die onse here vanden hemele dede
 Dat hi den duuel ghehinde dan
 Hem te proeuen als enen anderen man

Vanden levne ons Heren [1034-2015]

- HOert wat onse here dede te hant
 1035 Hi ginc castien ouer al siin lant
 Hi brac donwet die was geset
 Ende dede die besondichde van hare wet
 Hi toende hem saen der werelt al
 In derre wijs dat ic .v. segghen sal
 1040 Daer men kermesse oft brulocht dede
 Daer vele volcs was daer was hi mede
 Bedi quam hi daer vele volcs was
 Om dat hi daer castide ende las
 Wie hi was ende wat hi wilde
 1045 Hi meneghen van sinen sonden stille
 Hen was niemen in soe grote mesdaet
 Maer stont hijs af ende sochte raet
 Hine vergaf hem sine mesdaet dan
 Dus bekeerde hi menegen man
 1050 xij. ghesellen ginghen met hem
 Tote dat hi quam te iherulem
 Elken wijsde hi ende leerde
 Hoe hi donwetteghe bekeerde
 Hi gaf hen sin hi makese wijs
 1055 Si gauen meneghen dat paradijs

- Hare ghewerke ende hare tale
 Bekeerde meneghen sondeghen wale
 Teer stont geuiel gode onsen here
 Ende sinen iongheren die hem daden ere
- 1060 Dat sie quamen in eere stat gevaren
 Daer vele ioden gegadert waren
 Onse here seide den joden ose wet
 Die ons noch heden es gheset
 Die ioden wederseidenne al
- 1065 Alsoe als ic v segghen sal
 Hi seide so vele hi seide so wel
 Den ioden. die wreet waren ende fel
 Dat sie waren alle in vare
 Sie seiden dat gokelie ware
- 1070 Onse here seide wel hi ne swech niet stille
 Si saghen op hem met wreden wille
 Soe hi meer dede so hi meer seide
 Elc vanden ioden niet op hem leide
 Alle die sieke die waren int lant
- 1075 Die gheloue hadden ganste hi te hant
 Die cropele waren. blent oft doue
 Ganste hi te hant hadden si gheloue
 Menegen doden dede hi leuen
 Blende sien. dit es ghescreuen
- 1080 Meneghe miracle dede dan
 Die ic alle geseegghen niet en can
 Alsoe langhe als dese werelt sal staen
 Die miracelen die dan waren gedaen
 Ende god doet ende sint ende eer
- 1085 Men salre af lesen emmermeer
 Als onse here dese vertuut hadde gedaen
 Die ioden gingen te rade saen
 Soe valsche ende soe gebose
 Sie maecten onder hen grote nose
- 1090 Sie hadden onwert sine waert
 Sine tale. sine werke. sine vaert

- Sie seiden wie es dese man die dit doet
 Sine tale en dunct ons niet goet
 Wy ontraden hi moghe verkeren
 1095 Ons volc met sire talen ende offteren
 Wederseghen wi sine tale
 Dat sie ons niet en verkere so doe wi wale
 Si seiden wanen comt dese man
 Die dus onse volc bedrieghen can
 1100 Doe sprac .j. iode heren hort na my
 Hoert wanen hi comt ende wie hi sy
 Hi wille ons allen doen verstaen
 Met miraculen die hi heeft gedaen
 Dat hi god selue es
 1105 Hets min dan niet jc seg .v. wie hi es
 Dese ioseph was sijn vader
 Een arm cranc man si horden algader
 Hi hadden van marien sinen wiue
 Sie geneerden hem beide met armen liue
 1110 Wanen comt hem dit gheval
 Dat hi heeft dese gracie ouer al
 Tfolc dat wijst hi ende leert
 Ic weet wel dat hijt al verkeert
 Doe sprac .j. iode ghi segt wale
 1115 Hoert mine redene ende mine tale
 Wy sijn joden wel gheboren
 Van hoghen gheslachte sijn wi vercoren
 Wet geselschap heb wi ghesworen
 Breke wijt nu. wi sijn verloren
 1120 Selen wi gheloeuen desen man
 Die al tfolc begoclen can
 All sine tale an sijn ghebot
 Newy. maer anden hoghen god
 Dat god dede onsen vorderen ere
 1125 Hi quitese alle van groten sere
 Van sconincx pharaons knechten
 In sine heruaert in sine gevechten
 Wille god hi quite ons van hem
 Hi brachte ons tote iherusalem

- 1130 Die leuer zee ontploec iegen ons
 Also ons iaghede there pharaons
 Hy maecte ons wech sachte ende zoete
 Wy leden die zee met droghen voete
 Als wi die zee leden waren
- 1135 Al there dat na ons quam gevaren
 Die zee loec weder het verdranc
 Daer en was niemen hi en versanc
 Nu si wi so quite ende vri
 Dat hier en es keyser no coninc bi
- 1140 Die ons mogen gedvingen yet
 Seggic waer merct alle ende siet
 Moeyses gaf ons dese wet
 Die ons allen es gheset
 Die hem god screef ende gaf
- 1145 Nemmer en selen wiere sceden af
 Wat waent dese quade man
 Waent hi onse wet breken dan
 Neen hi niet hi pijnt om niet
 Also langhe als onser sal wesen iet
- 1150 Onse here god hi hoerde al toe
 Dat hem die ioden seiden doe
 Haer tale hi wel gemerct heeft
 Hen allen hi antwerde gheeft
 Ghi sijt onwettich ghi sijt verloren
- 1155 Ghi hebt v seluen al versuoren
 Ter quader tijt waerdi geboren
 Donreine hille heeft v vercoren
 Ghi hebt onwert mine tale
 Ende mine ghewerke gi en doet niet wale
- 1160 Ghi sijt bitter als ene galle
 Sduuels kinder sisi alle
 De duuel heeft v allen gesact
 Om hem peinsdi ende waect
 Ic die v. ghesciep ende makede
- 1165 Mi sceldi triwant ende verrakede
 Om v dedic miracle scone
 Ic quite v van pharaone
 Ic dedu doecht ic dedu eere

- Ic ledichde v van groten seere
 1170 Ic dede doer v. miraclen groet
 Ic gaf v planteyt wijn ende broet
 Gi loghenet mijns gi begaeft mi al
 In diere wijs ic v segghen sal
 Uwer negheen es gheboren
 1175 Hine hebbe enen afgod vercoren
 Dien gi vleiet dien gi minnet
 Dat gi noyt vwen god en bekinnet
 Ghi hebt onwert gode ende sine wet
 Elc aenbeet sinen mamet
 1180 In dese manieren in derre wijs
 Sidi verstoten van paradijs
 Haddi ghehouden wel die wet
 Die moeyses v hadde gheset
 Haddi ghevleyet gode den vader
 1185 Soe waerdi salich alle gader
 Ghi en daet des niet maer uwen wille
 Daer omme seldi in donreyne hille
 Nu es comen marien sone
 Donwet te brekene ende wet te doene
 1190 Sine wet es heilich ende goet
 Salich den ghenen diese doet
 Ic ben marien sone got
 Ic wille v seggen miin ghebot
 Miin gebot ende mine tale
 1195 Wel hem dise hoert ende houdet wale
 Hen es niemen die sijn geboren
 Die my onwert hine sy verloren
 Die houdet die gebode mijn
 Hi sal int paradijs sijn
 1200 Hout mine ghebode soe doedi wale
 Ic segge v nv hoert mine tale
 Die v vernoey ofte euel doet
 Ne haettene niet maer doet hem goet
 Die v nidet ofte haet
 1205 Vergheuet hem dat es mijn raet
 Mint v viande alle in gode
 Houdet wet ende mine gebode

- Mint uwen evenkerstijn inden name mijn
 So selen v v mesdade vergeuen sijn
- 1210 Eeret moeder ende vader
 Weest oemoedich al gader
 Morwe herte hebt op die arme
 Daer ghise siet v haers ontfarme
 Haue rijcheit hebt onwert
- 1215 Daghelijc broet dat bidt ende begert
 Weset suuer ende reene
 Ne geert niet het en si duwe allene
 Ne verraet ne ghenen man
 Scuwet vermesamheit ende ban
- 1220 Vleiet die papen eert die clerke
 Vroech ende spade sijt inde kerke
 Ghehoert uwen pape eer yemen el
 Doet dat hi seit soe doedi wel
 Sine tale dat siin mijn gebode
- 1225 Dat hi seit dat comt van gode
 Vellet euel ende strijt
 Ouer al daer ghi sijt
 Scuwet ommate ende ouerdaet
 Die es becommert gheeft hem raet
- 1230 Mint trouwe ende waerheit in alle tijt
 Sachte soete oetmoedich sijt
 Mint mijn ghebot hort mine tale
 Doet dat ic segghe so doedi wale
 Die doet dat ic hebbe gheseit
- 1235 Ende diet in sijn herte leit
 Eest man ofte eest wijf
 Hi es vroet ende hi es wijs
 Hi sal int hoghe paradijs
 Hebben dat euwelike lijf
- 1240 Ic ben v god ic ben v here
 Mi seldi gheuen lof ende ere
 Bedi so quamic onder v
 Donwet te brekene die gi hout nv

- aLs ihesus dit sermoen hadde ged[ae]n]
- 1245 .V^m. joden sonder waen
 Weenden hare sonden allegader
 Sie bekeerden hem te gode onsen vader
 Si liepen alle tonsen here
 Si riepen god hebbe lof ende are
- 1250 Dine gewerke ende dine tale
 Willen wi houden gerne wale
 Sie vielen op ons heren voete
 Sie aenbedene minlijc ende soete
 Al sijn gebod dat dochte hen goet
- 1255 Elc sine wet hout ende doet
 Onse here antwerde vele soete
 Den ioden die laghen op sine voete
 U mesdade siin vergeuen .v.
 Laet donwet die gi houdt nv
- 1260 aNder ioden waren daer
 Als si dit saghen si hadden vaer
 Die niet en geloefden onsen here
 Si waren in vruchten ende in sere
 Dat si saghen hare wet
- 1265 Te broken ende achter geset
 Sie stonden serech ende ondaen
 Dat hare afgode waren vergaen
 Sie sien hare wet te broken al
 Sie ontraden dat maumet bliuen sal
- 1270 Sie stonden alle serech ende veruaert
 Dat hare afgode sijn onwaert
 Sie hadden saen alle ene gedachte
 Elc onsen here spiedde ende wachte
 In welker wijs sine mogen vaen
- 1275 Verraden houden ende verslaen
 In meneger manieren in meneger wijs
 Wachten sie gode van paradijs
 Hoe hi mochte sijn verraden doch
 Het was om niet die wile en was niet noch

- 1280 Langhen tijt hadden dese noese
 Die valsche ioden ende die gebose
 Dat sine en mochten betrapen niet
 Onse here die weet al dat gesciet
 Sie seiden die waren fel ende bout
- 1285 Het soude doen seluer ende gout
 Dat marien sone soude verslaen
 Die al haer afgode hadde ontaen
 Sine letten niet maer al te hant
 Alle die ioden die waren int lant
- 1290 Gaderden hem in enen raet
 Die was fel geboese ende quaet
 Een out iode seide heren hort mine tale
 Versie wi ons soe doe wi wale
 Wat selen wi doen waer selen wi varen
- 1295 Wine connen ons versien noch bewaren
 Dese man hi doet al dat hi wilt
 Hi heeft ons afgode al gestilt
 Ghehinge wijs langer wi sijn ontset
 Hi verkeert ons hi brect onse wet
- 1300 Wy selen verraden ende vaen
 Daer na selen wine te steen doot slaen
 Ghedoghe wi langher dese daet
 Ende sine gewerke dats niet mijn raet
 Ghedoghe wi langer dat hi doet
- 1305 Wy ne hebben nember ere no goet
 Doen sprac .i. iode hiet cayphas
 Die hen hare wet spelde ende las
 Hi was haer biscop ende haer vader
 An hem gheloefdense alle gader
- 1310 Hi seide kinder hoert mine tale
 Ic ben .v. biscop nv merket wale
 Dat ic te mettenen eenwerf was
 Daer vandic in enen boec ende las
 Dat een man om sijn volc steruen moet
- 1315 Ic wane het es dese die miracelen doet
 Ic wane oec dat hi es gheboren

- Die steruen sal om die sijn verloren
 Sint ic dit gescreuen sach
 Merct dit kinder wat het wesen mach
- 1320 Ic was in vruchte ende in vare
 Ic ne wilt nochtan niet maken mare
 Alsoe die biscop dit hadde geseit
 Elc iode niet op jhesuse leit
 Hoe sine emmer moghen vaen
- 1325 In welker wijs ende moghen slaen
- pAeschen naecte dat hoge getide
 Dat al die ioden waren blide
 Die ioden hadden in hare wet
 En tsaterdaechs paeschen geset
- 1330 Die wile naecte het moeste wesen
 Verwlt dat men hadde gescreuen
 God die van marien was geboren
 Steruen soude om die waren verloren
 Iherusalem ginc hi versien
- 1335 Nochtan wiste hi wat soude gescien
 Om ons wilde hi storten sijn bloet
 Onse here weet al dat men doet
 Daer hi hersochte iherusalem
 xij. sire iongheren gingen met hem
- 1340 Daer sie quamen in enen dale
 Onse here sprac te hen dese tale
 Ghi heren seit hi hoert na my
 Hoert mine tale merct wat sie si
 Ic hebbe v. lief gi sijt mijn vrient
- 1345 Mi hebdi harde wel ghedient
 En weset niet rouwich maer weset blide
 Wi moeten sceden in corten tide
 Iherusalem ga wi versien
 Ic seg .v. wat nv daer sal gescien
- 1350 Donwettege volc dat niet ne vroet
 Dat trouwe. no wet. no waerheit ne hoet
 Dat sijn die ioden wreet ende fel
 Mi te verslane sin geren niet el

My selen sie verraden saen
 1355 Mi selen sie houden ende vaen
 Mi selen sie geselen ende slaen
 Mi selen sie cruce sonder waen
 Mi selen sie dorne setten op mijn hoeft
 Mi selen sie onwerden des mi geloeft
 1360 Mi selen sie spuwen in minen mont
 Mi selen sie onwerden als enen hont
 Anxt. seer. vernoy. ende rouwe
 Salic dogen om mine trouwe
 Ic moet laten daer mijn leuen
 1365 An den cruce het es ghescreuen

onse here god hine seide nemmeer
 Sine iongeren hadden alle seer
 Si waren rouwich si waren in vrochte
 Si pensden hoe dit wesen mochte
 1370 Peter sijn getrouwe vrient
 Die hem voer alle best hadde gedient
 Daer hi van rouwen staet ende beeft
 Ihesuse hi aldus antwoerde gheeft
 Here gi segt uwen wille
 1375 Mine ghesellen swigen al stille
 Wy wilden dat dit noch te seggen ware
 Dat gi hier nv maect so mare
 Ghi sijt soete ende sachte
 Bedi seldi doen al v ghedachte
 1380 Dat gi gheseit hebt tote nv
 Wi wilden dats berouwen moeste v
 Ghi sijt een so scone man
 Wat ghedachten hebdi dan
 Wildi. ghi leuet emmermeer
 1385 Waer omme gadi dan in dit seer
 Onse here antwerde peter dine tale
 Es kinscheit groet dat dunct mi wale
 Dune wets niet al dat ghesciet
 Noch minen wille ne wetstu niet

- 1390 Du segs berouwen moets my
 Berouwes mi ic segghe dy
 Al de werelt die ware verloren
 Die noit was ende es gheboren
 Als onse here dit sprac tote hem
- 1395 Hi ginc tote bi iherusalem
 Tote bethanie oetmoedelike
 Dit was voer paescen ene weke
- dAer quam maria magdalene
 So besondicht wijf ne was ne gene
- 1400 Daer onse here predicte ende las
 In symons huus daer hi geherbercht was
 Sie croep onder stoel ende onder banc
 Tonsen here dat sie ghedranc
 Sie croep met handen ende met voeten
- 1405 Onsen here sie wilde anegroeten
 Doen sie tons heren voeten quam
 Eene busse dat sie nam
 In die busse was salue soete
 Sie bat van haren sonden boete
- 1410 Sie droghese na met haren hare
 Van haren sonden was sie in vare
 Sie riep god ggehore my
 Hoer mine sonden ic segse dy
 Ic ben een besondichste wijf
- 1415 Die nie ter werelt ontfinc lijf
 Sie beweende hare sonden sere
 Sie riep genade gheweldich here
 Ghenade ghenade god ende man
 Dune ggehors mi wat salic dan
- 1420 Sie dwoech met tranen ons heren voete
 Vele minlic ende soete
 Ghenade ghenade gheweldich here
 Mine sonden rouwen mi sere
 Het en was nie man gheboren
- 1425 Mocht ic hine ware met mi verloren
 Ic nie dien man met oghen ne sach
 Mocht ic volbringhen hine met mi lach

- Ghenade ghenade geweldich here
 Mine sonden rouwen mi sere
 1430 Ic was behaghel ongemate fier
 In mi was prijs roem ende dangier
 Ic hadde onwert oemoedichede
 In mi was alle ledichede
 Genade ghenade geweldich here
 1435 Mine sonden rouwen mi sere
 Inne horde misse no getide
 Ic was in ledicheden blide
 Ic hadde onwert dijn gebot
 Ende dijn gewerken al waerstu god
 1440 Genade ghenade geweldich here
 Mine sonden rouwen mi sere
 Here mine sonden rouwen mi
 Ic wilre afstaen dat seggic di
 Inne mochte di gesegeen niet
 1445 Algader dat mi de werelt riet
 Genade ghenade geweldich here
 Mine sonden rouwen mi sere
 Du seits het en es niemen in die mesdaet
 Maer staet hijs af ende suect raet
 1450 Hine si quite comt hi te di
 Of dit waer es ghehore mi
- gOd onse here hi hoerde al toe
 Ten sonden die maria seide doe
 Hi wiste haer herte hi horde haer tale
 1455 Haer ghedachte bequam hem wale
 Met bliden oghen hise aensach
 Hi hiefse op daer sie op sine voete lach
 Dit sach symeon die was sijn wert
 Hem wondres harde hi hadt onwert
 1460 Symeon seide siet wonder siet
 Wiste dese man al dat ghesciet
 Wiste hi des wijfs mesdaet wale
 Hine soude niet horen hare tale
 Des wijfs sonden sijn so groot
 1465 Hen es niemen leuende no doot

- Wiste hi de sonden die si heeft gedaen
 Dat hise haer vergaue so saen
 Onse here keerde hem te symoene wert
 Ende sprac minlike hi was sijn wert
 1470 Symon seit hi du heefs messeit
 Van desen wiue die op mi screit
 Omme dit wijf so vragic di
 Ene sake symon antwerde mi
 Ofte .ij. mans sculdich waren scout
 1475 Ende sie ne hadden siluer no gout
 Deen .lx. penninge sculdich ware
 Dander v^c. van seluer sware
 Den genen diemen sculdich ware dese haue
 Of hijt hen beiden dan vergaue
 1480 Welc hare soude meer verlieuen den man
 Die hen die scout vergheuen hadde dan
 Symon seit here of ghijt gebiet
 Den genen dien hi meer hauen verliet
 Symon seit god du hefs waer geseit
 1485 Dese besondichde die op mi screit
 So ic haer meer verlate ic segge di
 So sie meer sal vleien mi
 Ic ben god marien sone
 Ic ben ghereet ghenade te doene
 1490 Die van sinen sonden gaet te rade
 Ende op mi met herten roept genade
 Ende in berouwenesse sy
 Ic horse gherne dat seggic dy
 Maria seit god houdt di ane mi
 1495 Dine sonden sijn vergeuen di
 Van dinen sonden wiltu staen
 Bedie sijn sie di vergeuen saen
 Diin berouwenesse es groot
 Bedien ghehordic di inder noot
 1500 Maria sciet in hoghen ende blide
 Van gode dien si haer sonden belide
 Dies auons herbergede god aldaer
 In symons huus ic segge .v. waer
 Smorghens vroech waest palmsondach

- 1505 Onse here gereit hem so hi ierst mach
 Xij. jongeren ginghen met hem
 Hi leidese tote iherusalem
 Hi ginc hen vroetheit al geuende
 Nochtan ghinc hi al beuende
- 1510 aLse onse here quam tote oliueten
 Een berch was alsoe geheten
 Tween jongeren hi dese tale seide
 Die hi vercoren hadde beide
 Gaet alle beide en luttel voert
- 1515 Te iherusalem binnen der poert
 Eene eselinne seldi venden daer
 Haer voelin met ic seggu waer
 Ontbentse ende brincse tote mi
 Dat ic v segge ic wille dat si
- 1520 Segt het geboet v god
 Die iongeren doen beide sijn gebod
 Sine waren traghe no lat
 Si liepen stappans in die stat
 Sie daden dat hen was beuolen
- 1525 Sie vonden deselinne ende haer volen
 Deselinne stont daer ember gereet
 Soe wie sose hebben mochte hi reet
 Sie was der werelt al gemene
 Sie hadde .v^c. heren allene
- 1530 Hort hier grote oetmoedichede
 Die onse here van hemel dede
 Dat hi soegedaen vee ontboet
 Wilde hi dies waer hem lettelt noet
 Sine iongheren brachten tote hem
- 1535 Deselinne van iherusalem
 Ende seiden here oft ghijt gebiet
 Ghedaen hebwi dat gi ons hiet
 Onse here hine scaemde hem niet
 Deselinne hi sadelen niet ne liet
- 1540 Hine wilde stegereep breidel no spore
 No ghereide no voerboech vore

- Hy ne wilde hernasch no diere gesmid[e]
 Peller sindael goutbort no side
 Hi hadde onwert roem ende prijs
 1545 Hi was vader van paradijs
 Sine iongeren gingen tenen rade
 Sie namen haer cleder haer gewade
 Sie leidense stappans onder hem
 Dus voer onse here tot iherusalem
- 1550 aLse tfolc in die stat vernam
 Dat daer die gods sone gereden quam
 Hem quam iegen groet ende clene
 Longe ende oude alle gemene
 Longe ende oude wijf ende man
 1555 Namen hare cleder dan
 Ende worpense midden den rinc
 Daer deselinne daer god op reet ginc
 Sie volgden processie viere ende viere
 Sie spleten risere van oliuiere
 1560 Die doen bloeiden in dien tide
 Sie worpense onder deselinne blide
 Doe dus ons here daer was ontfaen
 Ende dese processie was ghedaen
 Al tfolc dat daer gegadert was
 1565 Sanc met hoger stemmen ende las
 Willecome geweldich here ende man
 Dit riep elc kint al daer het ran
 Sie songen alle die daer waren
 Maer god die daer quam gevaren
 1570 Weende vele sere al dat hi mach
 Also hi die stat binnen sach
 Doe hi voerden tempel quam
 So groten rouwe dat hi daer nam
 Dat siin herte waende scoren
 1575 Als hem die sorghe quam te voren
 Doe hire in quam hem hadde onwert
 Dat hi daer cramen sach in gespert
 Dat men daer in cochte ende vercochte
 Onsen here dat groot onwet dochte
 1580 Dat waren ioden die geboose
 Die inden tempel maecten noose

- Sie vercochten daer in broet ende wijn
 Sie waren onwettich ende noch sijn
 Gi heren seit god hier es mesdaen
 1585 Ic segdu al soudi mi vaen
 Dit huus soudi met rechte eeren
 Hier in soudi alle leeren
 Hoe gi v sout te mi bekeren
 Hier in soudi v weldade meerren
 1590 Hier in soudemen aenbeden mi
 Elc man die in sonden si
 Het soude v moederkerke sijn
 Daer gi in vercoept broed ende wijn
 Nu eest worden een tauerne
 1595 Al vol van scoppe ende van scerne
 Daer binnen sceldi ende liecht
 Daer gi meneghen in bedriecht
 Wie was die tierst began
 Dat dit soude sijn een coephuus dan
 1600 Ghine vroet niet wel gi sijt verraect
 Dat gi vanden temple een coephus maect
 Doe hi dit seide si saghen op hem
 Soe vreselike die waren daer in
 Want sie waren alle veruert
 1605 Sie togen bisiden alle wtwert
 Hi liet wt sinen oghen gaen
 Eene clærheit op hen allen saen
 Daer ionge ende oude wijf ende man
 Ruunden den tempel stappans dan
 1610 Doe quamen cropele ende blende
 Daer quam die moede metten kinde
 Crancke sieke stomme ende doue
 Hi gansese daer dies hadden geloue
 Dit was in palmsondaghe gesciet
 1615 Als tsauons quam hi en blefer niet
 Hi ginc te betanien van iherusalem
 Sine iongeren keerden alle met hem

- Sanderdaechs waest maendach
 Onse here gereit hem so hi ierst mach
 1620 Hi kerde weder ten tempel wert
 Metten ioden hi disputeren begert
 Also hi ten temple quam gegaen
 Sine herte waent clieuen saen
 Dies hi daer in die selue weke
 1625 Moeste sijn gepassijt iammerleke
 Als hi den tempel binnen sach
 Ay herte seit hi ay lase o wach
 Herte dattu hier deluen salt
 Al sijn bloet dat hem verwalt
 1630 Ay suete herte wat sal dijns sijn
 Hoe sal siin die passie dijn
 Du salt anden cruce saen
 Scoren clieuen sonder waen
 Herte mochtstu spreken als .j. man
 1635 Hoe herde soutstu claghen dan
 Dine passie ende dinen noot
 Die in corten tide sal wesen groot
 Onse here vant ioden vele gereet
 Die op hem waren fel ende wret
 1640 Die geselschap hadden gesworen
 Sie leiden hem menich exemple te voren
 Sie seiden ghemeenlike alle dan
 Segge ons dat wi di vraghen man
 Wanen comt di dit geual
 1645 Dattu dese gratie hefs ouer al
 Segge ons dine voere ende dine vaert
 By wien sijn dese miracelen oppenbaert
 By wien sijn dese miracelen groet
 Du does enen opstaen die was doet
 1650 Ende enen sien die noeyt en sach
 Wy wonderen hoe dit sijn mach
 Du does die cropele rechte gaen
 Alle sieke ganstu saen
 Du does man al dinen wille
 1655 Segt ons bi wien. en swighe niet stille

oNse here antwerde ic segge .v.
 Al dat gi hier mi vraget nv
 Mine gracie ende mijn geual
 Willic baren ouer al

1660 Mine ghewerke ende mine daet
 Dats waerheit trouwe oemoet raet
 Alle mine saken ende mine gebode
 comen van mi ende van gode
 Ic ben god marien sone

1665 Ic ben gereet genade te doene
 Ic ganse sieke. blende ende doeue
 Dies met herten hebben geloeue
 Trouwe ende wet dat es mijn wille
 Di mi onwert sal in die hille

1670 Die mi vleiet hi es vroet ende wijs
 Hi sal met mi int paradijs
 Als onse here gesproken heeft
 Ende den ioden antwoerde gheeft
 Stappans eer hi danen geet

1675 Sie brachten hem een wijf geleet
 Die ioden ende seiden met enen monde
 Man dit wijf es vonden in sonden
 Wi hebbense vonden in hoerdoeme
 Onse wet gebiet dat mense verdoeme

1680 Moeysses hi maect ons mare
 Daer dus een wijf vonden ware
 Die in hordoeme ware gevaen
 Dat mense soude stenen saen
 Wat segdi man van derre dinc

1685 Vanden wiue die staet inden rinc
 Selen wise stenen alset es geset
 Dat wise stenen gebiet onse wet

oNse here antwerde wale des
 Ende sprac so wie sonder sonde hier es
 1690 Hi worp den eersten steen op dat wijf
 Ende dus stene haer sondich lijf
 Als hi dit seide si waren verueert
 Sie togen gemeenlike udewert
 Sie lieten dat wijf allene staen

- 1695 Die sie in hordoeme hadden geuaen
 Daer omme scieden si alle en woch
 Dat daer ne was niemen hi en ware doch
 Met sonden beseit ende beuaen
 Hier omme togense udewert saen
- 1700 Onse here seide wijf waer sijn sie geuaren
 Die iegen di ende mi hier waren
 Si voeren wech seise oft gi gebiet
 Als gi den steen op mi worpen hiet
 Si waren met sonden alle besmet
- 1705 Al geboet mi te stenene haer wet
 Wijf seit god wes vorwert meer reyne
 Ne wes meer met manne gemeyne
 Dine sonden siin vergeuen di
 Hout mijn gebot ende vleie mi
- 1710 Onse here daer te bliuene niet en geert
 Hi keerde te bethanien wert
 Daer hi herbergde ende lach
 Sanderdaechs waest disendach
- dEs disendaechs god onse here
- 1715 Met iongeren die hem daden ere
 Keerde weder ten temple binnen
 Daer nauwen raet die ioden hadden inne
 In welker wijs het mochte gescien
 Ende siet alle mochten sien
- 1720 Hoe ihesus mochte verslegen sijn
 Dit hadde elc iode int herte sijn
 Het en mochte vertellen tonghe
 Hoe die ioden oude ende ionge
 Pensden ihesum te verslane saen
- 1725 Sie quamen tote hem gegaen
 Sie seiden man segge ons waer
 Wi willent weten oppenbaer
 Bestu god en hels ons niet
 Soe weetstu man al dat gesciet
- 1730 Ic ben seit hi god ic maect v maer
 Ic ben gods sone ic segge v waer
 Ic ben v here en hels v ni[et]
 Ic weet uwen raet ende [al dat gesci]et

- Sie antwerden wine roeken wat gi segt
 1735 Noch wat talen gi voer ons legt
 Cume wetti half dat gesciet
 Wi gheloeuen v vele men dan niet
 God seide grote redene hen
 Nochtan sie geloefdenne in lanc so men
 1740 Elc iode seide al sijn macht
 Dit duerde tote in die donker nacht
- dEs gonsdaechs judas hine liets niet
 Also als hem die duuel riet
 Stappans als hi gesach den dach
 1745 Merct hi hoe hi ihesum verraden mach
 Al sijn ghepens al sijn gedachte
 Dat was dat hi poechde ende wachte
 Hoe sijn mester mach wesen doet
 Merct hier giericheide groet
 1750 Ten ioden ginc donwettege iudas
 Die een der .xij. apostolen was
 Heren seit hi hort na my
 Dat ic v segghe merct wat si
 Wat salic hebben wat sals sijn
 1755 Ocht ic v leuere den mester mijn
 Ocht ic v goede pennewerde doe
 Wildi spade wildi vroe
 Wat salic penninge hebben
 Ochtic v heme geleueren can
 1760 Gi heren ochtic uwen wille
 Van desen man volbringe stille
 Wat wildi dan geuen mi
 Ofte hi bi mi verraden si
 Dit seide iudas dien ioden bout
 1765 geloefden hem siluer ende gout
 Dertich penninge seluerijn
 Ochte hi verriede den mester sijn
 Donwettege ioden wreet ende fel
 Seiden iudas gi segt wel
 1770 [Jud]as dat vinden wi in onsen rade
 [Wij]st ons den man morgen auont spade

- dOen quam die witte donderdach
 Onse here stont op daer hi snachs lach
 Sine iongeren hi gegadert heeft
- 1775 Soete tale hi hen allen segt
 Kinder seit hi gaet bat voert
 Omtrent ende binnen der poert
 Kinder seit hi hoert na mi
 Dat ic v segge ic wille dat si
- 1780 Coept ons spise ende niet te vele
 Suet ons ene reyne sele
 Daer wi tauont ons in resten
 Sonder striden ende vechten
 Daer gi tauont in paeschen et
- 1785 Ende ic met v dat es de wet
 Sie daden alle sinen wille
 Si gingen in die stat ende swegen stille
 Elc cochte spise daer hise vant
 Ende gereidense al te hant
- 1790 Alst inden auont quam wel spade
 Tonsen here quamen sie te rade
 Here weltijt wildi eten gaen
 Onse here seit als gi wilt saen
 Sie gingen stappans sine letten niet
- 1795 Sie daden dat hen haer mester hiet
 Sie rechten die tafele kersen daer op
 Broet scotelen ende enen cop
 Alse midden hare werscap saten
 Daer sie gemeenlike in paeschen aten
- 1800 Onse here seide ene tale te hen
 Daer elc toe dede sinen sen
 Kinder seit hi ic ben v vrient
 Mi hebdi vele wel gedient
 Ic hebbe v lief ende gemint
- 1805 Maer uwer een es sduuels kint
 Hi es vermesamt ende verloren
 Hem ware beter ne ware hi geboren
 Hi et met mi hi lacht hi spelt

- Sine gedachte hi wel mi helt
 1810 Ic segt hem ic wist vele eer
 Eer hi nie gepensde dit seer
 Hi es vreisam ende fel
 Mi te verradene es hi snel
 Die wile vruchtic ende wachte
 1815 Die vrede gaet wt in derre nachte
 Hi es ewelike verloren
 Donreyne hille heeft hi vercoren
 Hi es onwettich ende versuoren
 Hem waer beter ne waer hi geboren
 1820 Hi sal mi verraden saen
 Den ioden. die mi selen slaen
 Mi selense geselen ende vaen
 Mijn lijf salre in sijn verdaen
 Onse here en seide niet meer
 1825 Sine iongeren hadden alle seer
 Elc stont op ende seide benix iet
 Onse here seide negi niet
 Elc wiste wel dat hijs quite was
 Sonder allene donwettege iudas
 1830 Hi seide techterst here benict dan
 Onse here antwerde dat segstu man
 Iudas seit hi du ets met mi
 Ic sal verraden sijn van di
 Dijn verradenesse dat es groet
 1835 Du saltre om hebben die bitter doet
 Onse here nam een broet te hant
 Ende seinet met siere heiliger hant
 Kinder seit hi neemt alle nv
 Van desen brode dat seggic .v.
 1840 Et dit broet al sonder vaer
 Het es mijn vlesch ic segge .v. waer
 Hi nam den cop daer na te hant
 In sine gebenedide rechte hant
 Kinder seit hi dits mijn bloet
 1845 Drinct et dit willic dat gi doet

- Alse ghedroncken hadden daer af
 Eene soppe hi elken gaf
 Ende oec ene soppe ontfinc iudas
 Die soppe sine verdoemnesse was
 1850 Dit es mijn vlesch seit hi ende mijn bloet
 Ic wille dat gi dese wise doet
 Ende doese inden name
 Dus sal messe gesongen sijn
 Dat was deerste wile die noyt was
 1855 Dat men messe sanc ofte las
 Die dach was ter goeder tijt
 Salich heilich gebenedijt
 Als dit was ghesciet ende gedaen
 Sie stonden op vander tafelen saen
 1860 Sine waren niet sat in scine
 Noch droncken oec van wine
 Onse here hi dede wale
 Hi nam .j becken ende ene dwale
 Kinder seit hi sit te ringhe nv
 1865 Dat ic wille doen gedoeget v
 Hi nam claer water al te hant
 Ende goet int becken met siere hant
 Hi dwoech haer voete met bliden wille
 Oetmoedelike si swegen stille
 1870 Alse hi te peters voeten quam
 Ende als hise in sine hande nam
 Peter beuede ende was verveert
 Here seit hi trect achterwert
 Gi sijt onse here wi sijn v knechte
 1875 Gi en selt onse voete niet dwaen met rechte
 Van v gi sijt so salich here
 Ne selen wi niet ontfaen dese ere
 Hoe soudi comen te dwaen onse voete
 Ghi sijt so minlic ende so soete
 1880 Wildi oec aengaen uwen wille
 Doet v gebod ic swighe al stille
 Gi sijt so wetende ende soe vroet
 Ic weet wel dat gijt doet om goet

- Peter seit hi ne duoegicse niet dy
 1885 Du en souds niet hebben lof met my
 Ghedoech di peter ende suich al stille
 Laet mi volbringhen minen wille
 Here seit peter ic ben ghestilt
 Doet van mi al dat gi wilt
 1890 Ocht gi wilt dwaet met mijn houet
 Al dat gi mi doet ic louet
 Doen seide onse here gi sijt mijn vrient
 Kinder seit hi ic hebbe .v. gedient
 Ic hebbe geduegen uwe voete
 1895 Oetmoedelic ende soete
 Dit boekin hebbic v gegeuen
 Also lange als gi sult leuen
 Seldi dus doen dies hebben noot
 V. loen daer af sal wesen groot
 1900 Maer enen scedic buten v
 Ghierghe iudas dat bestu
 Als iudas dit horde ende sach
 Hi geet bi siden so hi ierst mach
 Hi ginc ten ioden al met nachte
 1905 Als hise vant hem was vele sachte
- onse here bleef daer ende sine vrient
 Dien hi hadde stappans gedient
 Hi seide hen allen soete tale
 Hi nam orlof scone ende wale
 1910 Kinder seit hi lieue vrient
 Wetti twi ic v hebbe gedient
 Waer omme ginic v voete dwaen
 Dat willic v segghen saen
 Ghi heet mi meester ende here
 1915 Gi segt wel gi doet mi ere
 Ic hebbe gedient v allen hier
 Oetmoedelike sonder dangier
 Dus willic dat gi onderlinghe
 Sijt in plaetsen sijt in ringhe
 1920 Weest oetmoedich ende gevriende

- Bedie waest dat ic v diende
 Al dat ic segge dats waerhede
 Ic seggu wats oetmoedichede
 Oetmoedichede dat es .j. rijs
 1925 Dat elken leet int paradijs
 Oetmoet es .i. vrouwe alre docht
 Soe wiese hout in siere iocht
 Minen vrede dien geuic v
 Dien hout ember ende nv
 1930 Ic ben verde trouwe ende raet
 Verde beuelt al ouerdaet
 In dese maniere in derre wijs
 Sermoende onse here van paradijs
 Sinen iongeren die waren daer
 1935 Al dat hi seide dat was waer
- kInder seit god hort na mi
 Wy moeten sceden ic ende gi
 Het en sal nemmer daghen so saen
 Men sal mi tiersten hebben geuaen
 1940 Gi selt siin in groten sere
 Als men mi veet ic ben v here
 Men sal mi vernoey doen ende wee
 Dan seldi sceden als vee
 Dit sprac ihesus si waren in rouwe
 1945 Binnen hen allen soe was trouwe
 Peter stont op met groten sere
 Ende antwerde dus onsen here
 Here sidi verraden ofte geuaen
 Ic sal met v sin ofte gaen
 1950 Ghi sijt mijn here ic ben v wert
 Des en treckic niet achterwert
 Peter seit god hoghe tale du hefs
 Ic weet wattu geseit hier hefs
 Du best nv met dire talen bout
 1955 Du salt tierst vlien als men mi hout
 Peter seit hi houstu ane mi
 Ghescien sal dat ic segge di

- Eer te nacht die hane singen sal
 Du sals gelogent hebben al
 1960 Mijns .iij. werf eer middernacht
 Ia peter dien men wacht
 Dijn mont sal liegen dijn herte niet
 Peter ic weet al dat gesciet
 Die doet es bitter die haer mach ontgaen
 1965 Bedi saltu mijns lochene saen
 Peter antwert hoe mochte dit sijn
 Ic en weens niet in die herte mijn
 Dat ic uwes lochene in derre nacht
 Soe minnic v met al miere cracht
 1970 Peter seit god en ontsiet v niet
 Elc vrucht die doet daer hise siet
 Peter gi en selt met mi niet gaen
 Daer men mi sal leiden saen

- ONse here viel in kniegebede dan
 1975 Hi vruchte sijn doet want hi was man
 Daer hi bedde al daer hi lach
 Onse here weende al dat hi mach
 Daer hi ieghen derde leit
 Vele jammerlike dat hi screit
 1980 Daer hi lach op derde sie beuede
 Ende cloef voer hem. dit was sine bede
 Vader seit hi vanden trone
 Die mi sendes vele scone
 Ane die macht van hemelrike
 1985 Om te quitene arme ende rike
 Vader seit hi du best mijn here
 Ic ben beuaen met groten sere
 Mijn herte cliuet mijn anxt es groet
 Ic vruchte die bitterlike doet
 1990 Ocht wesen mach so quite mi
 Van deser noet des biddic di
 Hen was nie man no wijf
 Die in dese werelt ontfinc lijf
 Hi en vruchte passie ende doet
 1995 Anxt torment vernoey ende noet

Vader want dit waer es
 Hen es niet wonder al vruchtic des
 Al vruchtic mine passie dan
 Ic ben vleeschelijc als .j. ander man
 2000 Verre mi die bitter doet
 Quite mi van deser noet
 Soe seggic ochte het es versien
 Ochte het nemmer mochte gescien
 En maechs niet wesen here no sijn
 2005 So moete gescien den wille dijn
 En mach niet wesen iegen di
 Al dijn gebod gescie van mi
 Nu moete sijn van mi dijn wille
 Ne mags niet sijn ic swighe al stille
 2010 Dinen wille ende dijn gebod
 Willic doen want du best god
 Dat si v condich alle gader
 Dat hi es here ende vader
 Maer daer omme ontraet hi de doet dan
 2015 Dies hi was vleeschelijc als .j. man

Vanden levne ons Heren [2016-3026]

DOe sprac onse here toter doet
 Al was hi man sijn anxt was groet
 Ay doet die niemen en spaers
 Die ouer bosche ende water vaers
 2020 Ay torment ay bitter doet
 Du does miere herten wenen bloet
 Anxt ende seer vernoey rouwe ende noet
 Es in mi. mine passie sal sijn groet
 Ay doet dune spaers coninc no graue
 2025 Al es hi rike al heeft hi haue
 No jonc no out no wijf no man
 Ay bitter doet wat sal ic dan
 Ay doet. twi heefstu mi gemint
 Ia ne benic god marien kint
 2030 Ay doet ic ben in de gewout dijn
 Wat salic doen wat sals siin
 Ay doet. du heefs al dattu welt
 Du heefs mi in diere gewelt
 Al wasic van marien geboren
 2035 Doet. van dan heefstu mi vercoren

- Ay bitter doet hoe du best fel
 Doet en quaet och doet en wel
 Het moet tusschen dine hande gaen
 Ay bitter doet soe moetic selue saen
 2040 Onse here van hemele en seide nemeer
 So langhe lach hi daer in dat seer
 Dattene tcoude gemestert heuet
 Dat al siin lijf van couden beuet
 Te sinen iongeren ginc hi te hant
 2045 Slapende alle dat hise vant
 Sonder bedde ende al ontdect
 Oetmoedelike dat hise wect
 Kinder seit hi staet alle op
 Hier comt iudas ende maect sijn spot
 2050 Hier comen de viande mijn
 Hoe wee mach mi te moede sijn
 Met walmen ende met lanternen
 My te seekene dat si geren
 Sie bringhen glaiuen ende swert
 2055 Met rechte es mijn herte veruert
 Deen troest den anderen mi te vane
 Iudas troestese alle mi te slane
 Het en es niet om die verdiente mijn
 Maer het es om dat moet sijn
 2060 Hoe moegdi rusten ende slapen
 Daer hier comt dus menich gewapent
 Mi te slane ic ben v here
 Gi sout met mi sijn in allen sere
 Stappans daer hi dit heeft geseit
 2065 Elc spranc op al daer hi leit
 Ende seiden here of ghijt gebiet
 Al lagen wi hier wi en sliepen niet
 Maer wi hadden geweent so sere
 Om vwen torment soete here
 2070 Dat ons allen die vaec hadde beuaen
 Daer om moesten wi liggen gaen
 Iudas quam die ioden met
 Sine hilden no trouwe no wet
 Si hielden geselschap alle wale
 2075 Doe sprac iudas dese tale

- Heren seit hi hoert na my
 Elc uere van hem seluen sy
 Hout v te gadere wi selen saen
 Te minen mester comen gegaen
 2080 Dien wi alle willen vaen
 Als wi selen ende slaen
 Ic salne cussen hort na mi
 Dien ic cusse dat es hi
 Dien gi nidet alle ende haet
 2085 Dien man vaet bent ende slaet
 Dien toenet scone ghelaet
 Dien machmen doen alle quaet
 O iudas quade man
 Hoe fellen ghedachte hadstu dan
 2090 Als du souds verraden gaen
 Dinen mester ende slaen
 O iudas vele sondich lijf
 So caytijf ne was nie man no wijf
 Wat hadde dijn mester di mesdaen
 2095 Dattune verrieds dat men ginge slaen
 O iudas vermalendide
 Hoe mach dine ziele wesen blide
 Dattu marien sone verrieds
 Ende in sinen sere van hem scieds
 2100 Du waers onwerder dan .j. hont
 Als du cusses dijns mesters mont
 O iudas vermalendijjt caytijf
 Hoe onwettich was dijn lijf
 Dattu met cussene dinen here
 2105 Verrieds ende brachs in desen sere
 O iudas quade leckere
 Fel onwert gierich treckere
 Hoe dorstu nie wesen soe bout
 Dattu dinen here verrieds om gout
 2110 O judas du daeds dinen wille
 Daer omme berrenstu in donreine hille
 Du tormentes daer wel iammerlike
 Met rechte bestu daer ewelike
 Die caytijf hine lette niet

- 2115 Also als hem de duuel riet
 Hi quam gaende ende maecte sijn spod
 Ende custe. ende quedde sinen god
 Toten ioden seide hi dan
 Dit es mijn mester dit es de man
- 2120 Dien wi hebben tote nv gesocht
 Desen heb ic v vercocht
 Ne lettet niet maer al te hant
 Slater ane ghemeenlike ve hant
 Sijt in hogen en ontsiet v niet
- 2125 Staet al stille ende niet en vliet
 Hi es sachte man dat wetic wel
 Hi en es suer. no wreet. no fel
 Ic weet wel al sinen sede
 In hem so es oetmoedichede
- 2130 Wat stadi heren alle stille
 Gaet na hem doet uwen wille
 Neemtene bentene ende vaet
 Leitene daer gine te steen doet slaet
 Ia en waest niet geloeft ocht icken .v. gaue
- 2135 Dat ic dan hadde mine haue
 Ia hebdine doet al v gebod
 Dit es die man dien hem maect god
- ONse here van hemele hi stoet veruert
 Iegen de ioden hi hem niet en wert
- 2140 Maer suchte ende seit aylas
 En mocht niet bleuen sijn iudas
 Ic en moeste verraden sijn van di
 Waeromme cussestu dan mi
 Iudas en antwerde hem doe niet
- 2145 Maer duers op sinen here hi siet
 Ende pensde mochte sijn doet dese man
 Soe haddic .xxx. penninghe dan
- Die ioden quamen al te hant
 Ende sloegen gemeinlike hare hant

- 2150 Ane onsen here van paradijs
 Sijn herte wert couder dan .j. ijs
 Sie trockene alle wel iammerlike
 Sie stietene sere onsuerlike
 Daer en was negeen al dat hi mach
- 2155 Hine gaf onsen here stoet ofte slach
 Sie onwerden alle gode onsen here
 Sie geselden sijn vlesch vele sere
 Dat sine herte spou bloet
 Soe wee was hem al docht hem goet
- 2160 Sie spouwen hem in sinen mont
 Sie husten op hem als ware .j. hont
 Sie maectene seer ende ongesont
 Daer hi tusschen hen allen stont
 Sie voerden hem weder alst ware .j. dief
- 2165 Elc sloech op hem ende hief
 Ende haer cnapen die waren daer
 Sloegen haer hande in sijn haer
 Sinen iongeren was vele wee
 Sie scieden alle alst ware vee
- 2170 Alsoe alst god hen hadde geseit
 Elc daer hi vloet vele sere screit
 Sie waren in anxte ende in noet
 Elc ontsach die bitter doet
 Hi hadt geseit sie waren veruert
- 2175 Met hen droeghen sie oec .ij. svert
- aLse sente peter sach tgheuecht
 Dat sijn here dogede sonder recht
 Sonder verdiente ende sonder plecht
 Hem was wee want hi was sijn knecht
- 2180 Als hi daer quam hi trac .j. suert
 Hem iammerde sere hi hadt onwert
 Ende sloech malcuse enen knecht
 De rechte ore af hi hadde recht
 Daer men tormente sere
- 2185 Iammerlike gode onsen here
 Peter hi hadde grote onwerde
 Dies knechs daer hi metten suerde

- Dien seluen knecht enen slach gaf
 So dat sine ore vloech af
 2190 Onse here keerde hem te petren wert
 Peter seit hi nemt v swert
 Ende steket weder in die sceet
 Sleestu meer het es mi leet
 So wie seit hi met swerde sleet
 2195 Ochte speelt ochte diere mede geet
 Hi sal met swerden sijn leuen
 Verliesen. peter het es gescreuen
 Peter seit hi haddic gewilt
 Ic hadde dese ioden saen gestilt
 2200 Sonder wapen ende sonder swert
 Haddic mi vele saen verwert
 Peter ic hadde sonder waen
 xij. scaren ingelen saen
 Die iegen dese ioden soudon sijn
 2205 Inden troest ende in de hulde mijn
 Onse here nam die ore vanden knecht
 Die peter af sloech int geuecht
 Daer die knape voer hem stont
 Ende settese hem ane al gesont
 2210 Als dese vertuut was gesciet
 Die ioden en lietens hier omme niet
 Si namen alle gode onsen here
 Die was in anxte ende in sere
 Ende togenne saen ins bisscops sele
 2215 Daer vant hi viande herde vele
 Als hi daer quam te hant
 Si riepen alle dese es triwant

 PEter quam achter gegaen
 Daermen sinen here leidde geuaen
 2220 Nochtan trac hi dicke achterwert
 Daermen niet en hi was veruert
 Ter seelen quam hi gegaen vore
 Daer stoet .j. wijf ende hilt de dore
 Si sachene saen hi werts geware

- 2225 Sie quam te hem hi was in vare
 Man seise ic weet wel sonder waen
 Dat ic di sach gisteren gaen
 Metten man die hier es gevaen
 Sietmen di man men sal di vaen
- 2230 Segge mi man ne hels mi niet nv
 Wat sochstu hier wanen bestu
 Bestu leec ocht bestu pape
 Neen du best dies mans knape
 Peter antwerde den wiue dan
- 2235 Inne bekinde nie desen man
 Met hem so en benic niet gewone
 Oec hebbic lettelt met hem te doene
 Waric oec des mans knecht
 Ic soude node comen in dit geuecht
- 2240 Peter eenwerf gelochent heeft
 Als hi des antwerde gheeft
 Sijns mesters die was sijn here
 Het was cout peteren vroes sere
 Daer wermden hem der ioden vele
- 2245 Peter sach vier in midden die sele
 Al was hi serich ende veruert
 Nochtan ginc hi ten viere wert
 Daer hi biden viere staet
 Hem dochte datmen riep vaet
- 2250 Hi durkede als die besculdicht was
 Al vroes hem hi sweette als .j. das
 Een out iode quam te petren saen
 Daer hi stont vollic gevaen
 Ende riep man du dunckes mi dul
- 2255 Du dunckes mi riesheiden al vul
 In di soe es groet ouerdaet
 Inne sie die wile dat men di vaet
 Een man so es geuaen hier
 Die triwant es ende pantenier
- 2260 Hi liegt ons allen hi maect sijn spod
 Hi seget hi es coninc ende god
 Wi weten wel bi diere gelaet

- Ende oec bi dire talen ende daet
 Dattu sijn geselle best
 2265 Dies mans die seit hi es kerst
 Bedie dat wi dit weten wel
 Ende dit waer es hen es niet spel
 Sietmen di hier staen ende gaen
 Men sal di houden ende slaen
 2270 Peter herde daer iegen swert
 Dat hi en wilt no hi en geert
 Niet te wetene van desen man
 Dien hem die ioden seiden an
 Here seit peter gi en wet wat gi segt
 2275 No wat talen gi voer mi legt
 Inne bekinne desen man niet
 Ic en roec oec wat hem gesciet
 Als peter dese antwerde gheeft
 Twewerf hi ghelochent heeft
 2280 Het en leed niet .j. halue wile dan
 So quam geloepen een ander man
 Ende riep knape wat staestu hier
 Spijsdi desen pantenier
 Dien wi met rechte hebben geuaen
 2285 Die onse afgode heeft ontdaen
 Du best ries sagemen di hier
 Men worpedi stappans in een vier
 Peter wederseide hem al
 Ende seide ic en wille no en sal
 2290 Desen geloeuen die hem maect god
 An sine tale no an sijn gebod
 Als peter dese antwerde gheeft
 Driewerf hi gelochent heeft
 Als dit gesciede en was niet lanc
 2295 Stappans daer na die hane sanc
 Als die hane gesonghen hadde dan
 Peter was een serich man
 Hi begonde te wenen bitterlike

Ende bepensde hem serichlike
 2300 Wat siin mester hadde geseit
 Wat talen hi voer hem hadde geleit
 Eer nemmermeer quame dat songe de hane
 Hi soude driwerf sonder wane
 Sijns lochenen ende sinen name
 2305 Eer nemmermeer middernacht quame
 Ay lace seit peter sondich lijf
 Dat ic verwonnen ben caitijf
 Ic was deerste die seide boude
 Dat ic siins lochenen niet en soude
 2310 Nv benic deerste dies gelochent heeft
 Al siin lijf van rouwen beeft
 Hi weende als een serich man
 Dat hijs gelochent hadde dan

nV keren wi weder tonsen here
 2315 Die al dit was in groten sere
 Hoe men lachtert ende sleet
 Hoe men in groten rouwe leet
 Men brachtene ten bisscop in die seele
 Daer vant hi siere viande vele
 2320 Die bisscop seide tonsen here dan
 Wanen bestu segt mi man
 Ic hebbe gehort van di seggen vele
 Dies ic di vrage niet en hele
 Ic bidde di gherne dattu mi lijs
 2325 Wanen du coms ende wie gi sijs
 Du heefs miracelen vele gedaen
 By wien doedise segt mi saen
 By wien doetsu al dit lant
 Al verkeren te dijnre hant
 2330 Ane di so houden hem berge ende dale
 Dat doen dine werke ende dine tale
 By wien eest dat sie volgen di
 Inne wilt niet versten segt mi

oNse here antwerde. mine tale
 2335 Ende mine werken weten wale
 Die mi hebben gesien ende gehort

- Wie die siin doetse comen voert
 Eer dwaert quam wt sinen monde
 Een onwert knecht by hem stonde
 2340 Gaf hem in sinen hals enen slach
 Dat hi en horde no en sach
 Man seit die knecht du en best niet wijs
 Dattu souts in derre wijs
 Antwerde gheuen onsen here
 2345 Doe quamen ioden groet ende clene
 Out ende jonc al gemene
 Si togen onsen here alst ware .j. dief
 Elc iode sloech op hem ende hief
 Sie daden hem onsachte ende lede
 2350 Sie decten sine ogen met enen clede
 Hi wijcte hi was saechte als .j. lamp
 In hem en was felheit no scamp
 Doe sloech een iode onsen here
 In sinen hals onsachte sere
 2355 Als hine sloech hi seide dan
 Wie sloech di gerade man
 Doe quam een ander iode gegaen
 Tonsen here die was geuaen
 Ende decte hem thoeft als hine sloech
 2360 Als hine geslegen hadde hi loech
 Ende seide geraetstu sonder waen
 Wie di sloech ic late di gaen
 Onse here was oemoedich ende soete
 Hi wijcte tot op diere ioden voete
 2365 Ende gedoechde oetmoedelike
 Al dat men hem doet in die weke
 Hoe sere arende hi onse mesdaet
 Daer menne aldus sere slaet
 Dit doechde hi al om onsen wille
 2370 Onse here die roefde donreine hille
 Hoe onsachte was hem te moede
 Hoe sere mochte sijn lijf wesen moede
 Daer elc iode op hem vacht
 Dit was al in goeden vrinacht

- 2375 aLset dach was in goeden vriendaghe
 Die ioden brachten manne ende maghe
 Ende gingen alle in enen raet
 Die gebose was ende quaet
 Haer raet was in welker wijs
- 2380 Sie onsen here van paradijs
 Mochten tormenten toter doot
 Die beuaen was in groter noet
- pYlatus was in dien tide
 In dat lant breet ende wide
- 2385 Skeysers van rome was hi man
 Diet hem beuolen hadde dan
 Die ioden quamen te pylatus gegaen
 Onse here met hen die was geuaen
 Si seiden here siet hier den man
- 2390 Die god wilt sijn maer hi en can
 Die bringt in werringen al ons lant
 Hi heeft verkeert die rijcste tsire hant
 Hi heeft gedaen al dat hi wilt
 Hi heeft onse afgode al gestilt
- 2395 Hi heeft te broken al onse wet
 Bi hem es bleuen maumet
 Hi seit wonder hi seit hi es god
 Hets men dan niet hi maect sijn spod
 Wy leueren v hem al te hant
- 2400 Ja en sidi rechtere in dit lant
 Here doet van hem al v gebod
 Hi mocht dat sijn hi seit hi es god
 Iudas donwettege hi was met
 Dine vercocht hadde iegen wet
- 2405 Hi wert vael als ene longe
 Hi seide hort alle out ende ionge
 Desen man vercochtic v
 Dien gi hier hout geuaen nv
 Daer mede maecti alle v spod
- 2410 Gi mesdoet hi es gewarich god
 Hi es v here hi es v vader
 Hem soudi vleien allegader
 Hi es v god hi es v here

- Hem soudi doen lof ende ere
 2415 Vwer alre mesdaet es vele groet
 Dat gine tormentet toter doet
 Het was onwet het was onrecht
 Dat ickene v vercochte ic was sijn knecht
 Hi was mijn mester hi was mijn here
 2420 Al brachtickene in groten sere
 Die penninge die gi mi gaeft dan
 Als ic v vercochte desen man
 Om niet neemse weder alle
 Dese penninghe met getale
 2425 Nu wetic wel ic dede quaet
 Dat ic verriet dien gi hier slaet
 Dien gi hier dief ende triwant scelt
 Hi en ees niet nemt weder v gelt
 Ne wildijs oec niet ontfaen
 2430 Ic worpt voer vwe voete saen
 Die duuel die wel bedriegen can
 Out ende jonc wijf ende man
 Hi was de ghene diet mi riet
 Van desen die weet al dat gesciet
 2435 Hi es soe wijs hi es so vroet
 Hi weet wel wat elc man penst ende doet
 Hi weet alle dinc eer si gesciet
 Ic bade genade maer het ware om niet
 Die ioden antwerden iudase saen
 2440 O iudas gi sijt al ontdaen
 O iudas wat eest. wats v gesciet
 Al dat gi segt hets om niet
 Wat talen segdi ende lijt
 Wy wanen alle dat gi dronken sijt
 2445 O iudas gi dunct ons al ontleert
 Metten anderen sisi oec verkeert
 Gi segt dese man dat hi es god
 Noch wanen wi dat gi maect v spod
 Wi weten wel dat hi heeft .v.
 2450 Begokelt in corten tide nv

- Iudas gi sijt ries ende sod
 Dat gi dorret seggen dat hi es god
 Eest oec waer dat hi es v here
 Waer omme brachtine in desen sere
 2455 Ocht gijt brouwet drinket allene
 Met ons en sijt nemmer ghemene
 Die haue daer gine oec omme verriet
 Daer gi mede wort gemiet
 Ghi wilt weder geuen dat ghelt
 2460 Wy en willens niet no gi en selt
 Iudas of gi quaet brouwet so drinct
 Met rechte drinct hi quaet die quaet minct
 Wi en onderwinden ons uwes niet
 Wy en roeken oec wat v es gesciet

 2465 ALs iudas donwettighe dit sach
 Hi en weet wat hi doen mach
 Maer hi nam die haue al te hant
 In sine onwerdighe hant
 Voer der ioden voete dat hise leide
 2470 Penninghe gelijc hort wat hi seide
 Ocht gi die haue en wilt niet
 Waer sie voer v voete leit nv siet
 Die ioden namen te hant dat ghelt
 Ende cochten een gemene velt
 2475 Daer men elken daghelike
 Binnen grauet arme ende rike
 Die peelgrime sijn ende comen daer
 Thilich graf versoeken ic seggu waer
 Donwerdige iudas donwettege man
 2480 Die vermaledide sciet van hem dan
 Ende nam een zeel in sine hant
 Ende verhinc hem seluen al te hant
 Desen loen hadde hi daer af
 Daer hi sinen here den ioden gaf
 2485 Of hi quaet brau hi allene drinct
 Dus loent die duuel die quaet minct
 Dus loent die duuel mannelike

- Es hi ionc out arm ofte rike
 Die hanghen alle aen sinen raet
 2490 Sijn loen hi es emmer quaet
 Binnen dien dat dit was gesciet
 Die ioden en lietens hier omme niet
 Sie tormenten gode onsen here
 Sie leiddene te pylatuse met groten sere
 2495 Daer waren ioden groet ende clene
 Sie leddene te pylatuse algemene
 Here pylatus gi sijt in dit lant
 Vogt ende rechtere hets in v hant
 Dats hier sede ende recht
 2500 Daermen vint man ofte knecht
 Die boesheit driuet oft onwet iaget
 Datmen v ouer hem claghet
 Daer ghi die waerheit prouen mocht
 Dat gine verdoet en siin vocht
 2505 Dat seggen wi om desen pantenier
 Dien wi gevaen houden hier
 Hi seit hi es onser alre god
 Met ons allen maect hi sijn spod
 Al seit hi ons sine tale scone
 2510 Wy prisenne men dan een bone
 Sijn sermoen ende sine wart
 Sine werken ende sine vaert
 Heeft die beste alle in dit lant
 Verkeert ontrect te siere hant
 2515 Hi wilt ons allen oec verbieden
 Armen riken allen lieden
 Dat wi tseins gelden niet
 Den keyser hoe mach dat sijn siet
 Here pylatus doet ons ene bede
 2520 Ondervint des mans sede
 Vraecht wanen hi comt ende waer hi wilt

- Waer toe hi onse wet heeft gestilt
 Pylatus was vocht int lant
 Hi vraechde onsen here al te hant
 2525 Segt mi man wies onderwinstu di
 Bestu gods sone segge mi
 Dese heten mi dat ic v vraghe
 Wie du best wie sijn dine maghe
 Bestu coninc ende god
 2530 Die ioden die met di maken spod
 Soe wat vernoeye so di gesciet
 Du swichs al stille dune wers di niet
 So wat tormente so men di doet
 Du dunckes mi oetmoedich ende vroe[t]
 2535 Du best verduldich ende sachte
 Wanen comt di dese gedachte
 Daer men stercte minen onwille
 Ic mochte vele bet swigen stille
 Dit seit pylatus god onse here
 2540 Suech al stille ende suchte sere
 Pylatus keert hem ten ioden
 Ende seit mi dunct in minen sen
 Dat gi sijt sot alle ende kint
 In vende in desen quaetheden en twint
 2545 Wat eysche di hem wat es v wille
 Dese doet best hi swijcht al stille
 Ic wane gijt horet alle ende saghet
 Dat gi mi baet ic hebs hem gevraghet
 Hine mesandwert niet en twint
 2550 Hi dunct mi eenwldich als een kint
 Omme dat ic geloeuen can
 So ne canic vinden in desen man
 Sonde. mesprijs. no dorperhede
 Maer sachtheit. gemate oetmoediche[de]
 2555 Vondic oec an hem mesdaet
 Dat hi dreue boesheit ende quaet
 So vaste es hi in mine hant

Ic soudt hem gelden al te hant

- pYlatus hi en seide niet meer
 2560 Die ioden hadden alle seer
 Ende riepen en heeft hi niet vele mesdaen
 Dat hi onse wet heeft ontaen
 Wat dunct v heren raet en es hi sot
 Dat hi hem der heten got
 2565 Doet ons recht dat es ons lief
 Men crucene saen als enen dief
 Hi es logenare ende pantenier
 Al heeft hi v begokelt hier
 Ia en sidi rechtere in dit lant
 2570 Cruustene cruustene al te hant
 Binnen dien dat dit was. pylatus wijf
 Die hadde een harde ontfermich lijf
 Sie bat hem dat hine liete gaen
 Dien man dien hi daer hilt geuaen
 2575 Pylatus seise ic ben v wijf
 Ic ende gi dat es een lijf
 Deen es den anderen sculdich trouwe
 Loest desen man van desen rouwe
 Tehant omtrent der middernachte
 2580 Als men desen tormente onsachte
 Ic horde ende sach daer selke sake
 Daer ic om ben tonghemake
 Om dese sake die ic sach
 Dien man laet gaen oft wesen mach
 2585 Ic weet bi dien boekine wel
 Dat hi en es no suer no fel
 Genadech hem pylatus sijt
 Dit was omtrent primetijt
- TE paeschen so was hare wet
 2590 Die die ioden hadden geset
 Daer .ij. mesdagege waren geuaen
 Datmen den enen late gaen
 In dien tide was barnabas

Geuaen dies hi mesdadich was
 2595 Al was hi iode hi hadde mesdaen
 Om sine mesdaet was hi geuaen
 Pylatus quam ten ioden gegaen
 Ende seide hier sijn si .ij. geuaen
 Barnabas om dat hi was sot
 2600 Ende dese man die seide hi es got
 Welken wildi laten gaen
 Van desen tween die sijn geuaen
 So barnabasse so desen man
 Die ioden riepen alle dan
 2605 Here barnabasse laet gaen
 Ende desen man laet ons verslaen
 Al heeft barnabas nv mesdaen
 Hem berouwes hi wils afstaen
 Hi es hoge man ende wel geboren
 2610 Dat ware onrecht bleue hi verloren
 Maer dese man hi dunct ons sot
 Om dat hi segt dat hi es got
 Dese man heeft onse wet ontaen
 Met rechte wert hi anden cruce gedaen
 2615 Die die selke voere iaget
 Ende hem dus ouer al beiaget
 Ghehinghes here ons allen eyst lief
 Dat wine voeren als enen dief
 Here pylatus gi sijt in dit lant
 2620 Rechtere cruustene al te hant
 Als dit was groet ende clene
 Riepen si lude alle gemene
 Here barnabasse laet quite gaen
 Dien gokelere laet ons verslaen
 2625 Pylatus saen antwerde geeft
 Alsoe die boec ghescreuen heeft
 Heren wetti wat gi iaghet
 Wetti waertoe gi v beclaghet
 Dese man hi dunct mi god
 2630 Dat gine dus iaget gi dunct mi sod

- Gine wet entwint niet wat gi doet
 Dat gine torment dus gi mesdoet
 Alse pylatus sprac dese tale
 Doe seide een gi en segt niet wale
 2365 Pylatus gi doet ons verstaen
 Dat dese man die hier is gevaen
 Iegen v so heeft ghedaen
 Dat gine quite wilt laten gaen
 Hier en es no ionc no out
 2640 Hi en wane dat ghijs hebt gout
 Dat ghi hem dus ghenadich sijt
 Dat gi dus sinen wille lijt
 Dus en comt hijs niet en woch
 Om niet pijndijs pylatus noch
 2645 Eest v leet ocht eest v lief
 Wy selenne voeren als enen dief
 Doe quam een ander iode wel out
 Ende seide geselle en sijt niet stout
 En spreect niet tonsen here stoutelike
 2650 Laet mi spreken oetmoedelike
 Here pylatus gi sijt onse here
 Dicke hebdi ons gedaen grote ere
 Gi en waert noyt eer tonswert fel
 Maer ons dadi altoes wel
 2655 Nv doet ons ere wi hebbens noet
 Laet ons desen man bringen ter doet
 Dat wanic en wert hi niet verdaen
 Gi ende wi sijn al ontaen
 Al bidt v wijf dat gine laet gaen
 2660 Doedijt gi hebdt wel herde mesdaen
 Wildi oec horen na wiue tale
 So en houdi nemmer vogdie wale
 Pylatus antwerde wel saen nv
 Laet mi met gode ende hebtene v
 2665 Inne onderwinde mi des mans niet
 So wat heden oft margen gesciet

Dat v allen condich si
 Dat die onscout es binnen mi
 So wat van hem wert gedaen'
 2670 Stont an mi ic lietene gaen
 Als hi dit sprac doen riepen si alle
 Die bittere als ene galle
 Here pylatus gi segt wale
 Ons allen becomt wel uwe tale
 2675 Hier en es no ionc no out
 Die wilt dat gijs hebt scout
 Gaet op hoer ende swicht al stille
 Laet ons van hem doen onsen wille
 Wi dorren wel wesen so bout
 2680 Ende onse kinder sijn si ionc ofte out
 Dat wi sire doet hebben scout
 Ende en gauen wi daer omme onse gout
 Nv bidden wi v wel lieue here
 Dat gi ons allen doet groet ere
 2685 Dat barnabas moete quite sijn
 Ende desen nemen dat leuen sijn
 Als pylatus dit horde ende siet
 Dat het en mach bliuen niet
 Ihesus en moeste sijn verdaen
 2690 Hi lietene vter persen saen
 Hi seide man hier es dus gevaren
 Inne mach di gehulpen no bewaren
 Men moet di crucen sonder waen
 Heden desen daghe saen
 2695 Waer omme laetstut wat deert di
 Ochte du segs de waerheit mi
 Met mi so machstu wel sijn coene
 Du heefs oec met yemene lettelt te doene
 Eest logene eest waerheit dattu iaegs
 2700 Est waer dies du di behaechs
 Du best god segstu ouer waer
 Dat maecstu al den ioden maer

Eest waerheit so bestu verdaen
 Liegstu daer omme du salt ontgaen
 2705 Onse here antwerde pylatuse saen
 Ic ben god seit hi sonder waen
 Ic ben coninc ende god
 Der ioden die maken haer spod
 En ben nemmer so veruert
 2710 Dat ic des trecke achterwert
 In dart wel seggen ouerwaer
 Dat ic ben god want het es waer
 Doe seide pylatus al te hant
 Du wets wel dat in mine hant
 2715 Dine doet es ende dijn leuen
 Dat ic di mach beide geuen
 Willic ic mach di laten gaen
 Willic ic mach di te doet slaen
 Dijn lijf dine doet es in mine hant
 2720 Want ic ben meyer in dit lant

oNse here wel soete antwerde geeft
 Daer hi van vruchte staet en beeft
 Pylatus seit bi dine cracht
 Dijn gewilt ende dine macht
 2725 Die du hefs comt di van my
 By my eist al dat seggic dy
 Pylatus keert ten ioden saen
 Ihesus met hem die was geuaen
 Heren seit hi gi iaghet quaet
 2730 Doet wel ende soeket anderen raet
 Ic dar wel seggen oppenbare
 Dat dese man seit dat es ware
 Hi es v coninc ende .v. god
 Waer toe maecti met hem v spod
 2735 Hi es onwettich ende sod
 So wien niet en hout ouer sinen god
 Iegen v so en heefti niet mesdaen
 Waer toe wildine crucen gaen

- Bekeert v ende gaet tanderen rade
 2740 Ende roept op desen man genade
- [D]Ie ioden valsche ende gebose
 Maecten nv vele grote nose
 Ende riepen alle gemeene
 Longe oude grote ende clene
 2745 Wi en willen anderen coninc negenen
 Dan sesare onsen keyser allene
 Eyst in paeschen eyst in rinc
 Wi en willen anderen coninc
 Dan desen keyser onsen here
 2750 Hem willen wi dragen lof ende ere
 Doen seide .j. iode kinder swich stille
 Ic sal nv seggen minen wille
 Here pylatus bedinct v bat saen
 Van desen die hier es geuaen
 2755 Gi wiltene quite laten gaen
 Wist die keyser gi waert ontdaen
 Men mach hier groet wonder sien
 Dat gi v pijnt gi en wet wien
 Coninc te maken ouer onsen here
 2760 Wet gi selet amen seere
 Als pylatus dit vernam
 Die tale hem niet wel en bequam
 Hi was in vruchten ende in varen
 Want quaemt sinen here in maren
 2765 Die hem beuolen hadde dat lant
 Hi sout hem nemen uter hant
 Dies pylatus dit ontriet
 Ende oec dat hem de duuel riet
 Hi quam gelopen tonsen here
 2770 Ende toegene onsachte scre
 Hi scorde ons heren cleder saen
 Soe trachine daer hi stont geuaen
 Hi dwanckene an die selue wile
 Ende bantene vaste an enen stile
 2775 Daer hine anden stile bant

Daer was gereet wel menege hant
 Dan lietense barnabasse gaen
 Ende onse here bleef gevaen
 Als een onsculdich serich man
 2780 Tsweet hem tallen leden wt ran
 Sweet en bloet so storte hi daer
 Doer onsen wille dat was waer
 Doen riep daer wel menich quaet
 Inne weet oft hi vaste staet
 2785 Dese man heeft so vele gedaen
 Ic duchte dat hi mach ontgaen
 Hen leet doe niet .j. half wile
 Twee ioden quamen toten stile
 Elc brachte ene ghesele in sine hant
 2790 Ende gheselden onsen here te hant
 Sine vierden niet maer al in een
 Gheselden sine tote in de been
 Sijn bloet ran hem op sine voete
 Soe wee was hem al docht hem soete
 2795 Als dese ioden moede waren
 Twee andere quamen saen gevaren
 Ende geselden gode onsen here
 So ongemate ende soe sere
 Dat sine tranen vielen op die erde
 2800 Dat hi sijns selfs inde gerde
 Daer maecte menich iode sijn spod
 Ende riepen alle man bestu god
 Bestu coninc ende onse here
 Waer omme staetstu in desen sere
 2805 Al dat sie op hem riepen dan
 Hi stont als een serich man
 Al dat si sloeghen hi swech stille
 Dit doechde hi om onsen wille
 Dat hi daer stont gebonden
 2810 Dat was al om onse sonden
 Al dat menne geselt ende slaet

Dat was al om onse mesdaet
 Om sine verdiente en waest niet
 Dat ihesus hem tormenten liet
 2815 Ne hadde hi gedoecht desen noet
 Ende daer na die bitter doet
 Al tfolc dat nie was geboren
 Dat ware al in die helle verloren
 Dies die here van hemelrike
 2820 Doechede passie om arme ende rike
 Wy souden peisen dach ende nacht
 Hem te dienene na onse macht
 Dicke bidden ende waken
 Hoe wi dat mochten geraken
 2825 Dat wi quamen te sinen rike
 Daer omme souden wi pensen manlike

nV keren wi weder tonsen here
 Die stont gebonden onsachte sere
 Datmen gheselt ende perst
 2830 Dies dorsti seggen hi waer kerst
 Alsene pylatus dus heeft
 Gheleuert. dan hi orlof gheeft
 So wie daer es die soe vele mach
 Dat hi ihesuse geue stoet ofte slach
 2835 Kinder seit hi gaet te hem noch
 Die niet en slaet hi worpe doch
 En ontraet v niet maar maect v bout
 Ic gheue v orlof eest ionc eest out
 Soe wie so mach den man geslaen
 2840 Hi sal sijn al ongeuaen
 Daer en was niemen diet nv liet
 Alst hen dus pylatus hiet
 Hi en sloech mochte hi onsen here
 En sloech hijs niet hi werpen sere
 2845 Onse here gaf wel menegen sucht
 Daer na so werp so menich wocht
 Hoe onsachte ihesus suchte gaf
 Daer so menich colue slach
 Om hem heffet ende sleet

- 2850 Niemen daer sijns en meet
 Deen riep den anderen vanc slach
 Ihesus antwerde ay lase o wach
 Doen riepen dandere stoet herde hijs god
 En hendert hem niet hi maect sijn spod
- 2855 Hoe wee was siere herten te moede
 Daer so menege scarpe roede
 Stac in sine soete huut
 Datter dat bloet sepelinge ran wt
 Daer die iode warp ofte sloech
- 2860 Als ihesus suchte die iode loech
 Doen quam geloepen een out iode
 Die van ghesellenne was herde moede
 Ende brachte met hem .j. mantelkijn
 Ende hinct ihesuse an die scouderen sijn
- 2865 Doen quam een ander iode gegaen
 Tonsen here die stont gevaen
 Ende brachte met hem een roedekijn
 Ende gaeft ihesuse in de hant sijn
 Doen riepen si hadde hi ene crone
- 2870 Scarp van dorne soe waer hi scone
 Dan waer hi coninc na sijn recht
 Doe quam een wel onwert knecht
 Ende brachte dorne wel gereet
 Scarpe ruwe. een iode geet
- 2875 Ende maecter af ene scarpe crone
 Onsen here vanden trone
 Ende settese hem op sijn hoeft saen
 Ihesus nictie die was geuaen
 Een iode die crone so vaste op sijn hoet perst
- 2880 Die op sijn hoet hilt de heilige kerst
 Dattere dat bloet vte ran
 Vele onsachte suchte ihesus dan
 Ihesus hadde alsoe menege wonde
 Alsoe meneghen doren hi beconde
- 2885 Nu begonsten si op hem te berne

- Felliyc ende oec te scerne
 Sie knielden ende maecten haer spod
 Ende riepen her coninc her god
 Ghi sijt onse coninc ende onse here
 2290 Met rechte doen wi .v. dese ere
 Elc iode stont erre als .j. hont
 Hen scumden de tande als enen hont
 Si waren verwoet ende dul
 Sie waren alle venijns wl
- 2895 [D]Ie ioden ontbonden onsen here
 Als hi was ghegeselt sere
 Ende daden hem sine cleder an
 Een iode riep vele lude dan
 Her coninc nu swichdi stille
- 2900 Nu doen wi van v onsen wille
 Neemt dit cruce op uwen hals saen
 Comt met ons daer wi willen gaen
 Ende draecht dese cruce met
 Wi selen v leren onse wet
- 2905 Doen riep een out iode vele saen
 Ocht giere selt sijn ane verdaen
 Ghi moetse selue dragen saen
 Gi moetter die doet ane ontfaen
 Om niet eest dat ghi gherne let
- 2910 Gi moetse selue dragen met
 Hefse selue op uwen hals saen
 Ochte neen ic sal v slaen
 Wat twifelt v wat stadi stille
 Ic heet v doet minen wille
- 2915 Ihesus onse wel lieue here
 Begonste te wenene onsachte sere
 Ende sleet sijn heileghe hant
 An dat cruce al te hant
 Dat cruce was swaer ende lanc
- 2920 Hi en const geheffen hi was so cranc
 Dat en was niet wonder dat hi cranc was

Hi was ghemaect moede ende las
 Die ioden maecten haren spot
 Ende hieuen hem dat cruce op
 2925 Hi droecht te caluarie dan
 Daer volgede mede menich man
 Te caluarie was dan sede
 Daer men die dieue verdede
 Dat daer onse here die cruce droech
 2930 Daer was menich iode die loech
 Dies hise droech soe cranckelike
 Nochtan droech hise oetmoedelike
 Een man quam ieghen hen geгаen
 Die symon hiet si riepen saen
 2935 Die ioden hieten symon dan
 Dat hi holpe draghen den man
 Symon hine dorst laten niet
 Hi nam dat cruce als ment hem hiet
 Ende halpt draghen onsen here
 2940 Die ginc al beuende vele sere
 Alsie te caluarien quamen toe
 Een jode ontbant ihesuse doe
 Die vaste riemen ende die bande
 Die geperst hadden sine hande
 2945 Daer die iode dat cruce recht
 Daer was gereet wel menich knecht
 Daer hise wilt setten al te hant
 Daer was gereet wel menich hant
 Die daer dat cruce vesten in deerde
 2950 Daer was menich iode die gherde
 Te siene die passie ende die noet
 Ende ons heren bitter doet
 Dit hadde onse here selue vercoren
 Om sijn volc dat was verloren
 2955 Papen leec wijf ende man
 Mochten hier nemen boekin an

- Wy en souden siin condich no fier
 Om dat wi moghen merken hier
 Hier horen wi grote oetmoedichede
 2960 Die onse here selue dede
 Wi souden sijn gemate niet fier
 Om dat wi moghen merken hier
 Hier horen wi grote oetmoetdechede
 Die onse here selue dede
 2965 Wi souden sijn gemate niet fier
 Om dat wi an ihesuse mogen sien
 Hi was oetmoedich ende gemate
 In hem was so groten karitate
 Dat hi om ons hem seluen gaf
 2970 Ende was gheleit in een graf
 Dit dogede hi om ons al gader
 Die was ende es ons ewelijc vader
 Die ioden gingen alle omtrent
 Ende gereiden dat torment
 2975 Hoe dat cruce soude staen
 Daer ihesus ane soude sijn verdaen
 Die wile dat sie onledich gaen
 Onse here viel in kniegebede saen
 Daer hi ieghen derde lach
 2980 Hi suchte dicke al dat hi mach
 Hi gruette dat cruce scone ende wale
 Dit was ten cruce sine tale

 cRuce di heb ic begheert
 Cruce di heb ic wel weert
 2985 Cruce du gewords ter goeder tijt
 Cruce du best gebenedijt
 Ic ben god marien sone
 Ic sal an di eer heden noene
 Steruen ende laten mijn leuen
 2990 Om mijn volc het es gescreuen
 Cruce du waers tote nv gehaet

- Men hilt di al ouer quaet
 Voert meer so saltu sijn gemint
 Al dat ic sal siin bekint
- 2995 Ay cruce al hebic di so wert
 Hoe sere es mijn herte ververt
 Dat si ane di al sonder waen
 Scoren cliuen sal herde saen
 Ay cruce ic hebbe ane di vercoren
- 3000 Te steruene om die sijn verloren
 Dies ic deeluen sal an di
 Cruce daer omme saltu sijn so vri
 Dat die gemene werelt al
 Di vleien ende aenbeden sal
- 3005 Cruce du salt wesen scilt
 Iegen elx sduuels gewilt
 Cruce an di sal menich man
 Van mi nemen boekin an
 Cruce du salt sijn geeert
- 3010 Dine salichede sal sijn gemeert
 In di salic storten mijn bloet
 Diet deert ofte wert hi en is niet vroet
 Cruce ic gheue di voert meer leen
 Dat wijf no man en es negheen
- 3015 Die op mi met herten roepen genade
 Eyst nacht dach vroech oft spade
 Datten de duuel nemmer en scint
 Es hi in node es hi in tormint
 Hine si seker ende vri
- 3020 Ieghen den duuel dat geuic di
 Cruce en haddic di niet vercoren
 Al die werelt bleue verloren
 Ic vergeue hem sine mesdaet
 So wie mi torment ofte slaet
- 3025 Ay cruce heilich ende goet
 Daer ane ic steruen moet

Vanden levne ons Heren [3027-3930]

hEt was ondere die ioden quamen
 Onsen here dat sie namen
 Met meneger geselschap
 3030 Ende oec met groter bliscap
 Ane den cruce sine hieuen op
 Si maecten met hem alle haer spot
 Si namen yseren nagele saen
 Ende quamen tonsen here gegaen
 3035 Si nichelden vaste sine voete
 Met groten naghelen vele onsoete
 Oec sloeghen si naghele in sine hande
 Die geperst hadden sere die bande
 Dat bloet ran al dat cruce tale
 3040 Dat bequam den ioden wale
 Dat dat bloet sepelinghe ran
 Daer loech wel menich iode dan
 Nochtan en was daer man negeen
 Hine sach cliuen stappans den steen
 3045 Daer dbloet op dat inde ran
 No daer en was niemen dies ontfermenisse nam
 In dit vernoey in desen sere
 Quam sijns dancs onse lieue here
 Die ioden en lietens hier omme niet
 3050 Alsoe alst hen de duuel riet
 Si maecten haer scop ende haer sceren
 Op ihesuse lelic si geberen
 Nu warens coene ende bout
 Nv warens alle onmaten stout
 3055 Al hadden sine nv te haren wille
 Ihesuse sine sueghen niet stille
 Onse here was sachte als een lamp
 In hem en was felheit no scamp
 Maer hi verdroech oetmoedelike
 3060 Dat menne voerde onwerdelike
 Dit doechde hi om ons algader
 Onser alre euwelike vader

 tVee dieue hilt men daer geuaen
 Die met ihesuse gecruust waren saen

- 3065 Eenen dief die te siere rechter hant
 Den anderen ter slinker al te hant
 Doe quam geloepen her pylatus
 Ende screef bouen hem aldus
 Waer omme ihesus ware geuaen
- 3070 Ende oec anden cruce gedaen
 Dit was die brief Dit was ihesus
 Der ioden coninc nazarenus
 Doe riepen die ioden saen
 Pylatus wat hebdi gedaen
- 3075 En scrijft niet dat hi es int lant
 Coninc. maer dat hijs hem onderwant
 Pylatus antwerde vele saen
 Dat ic screef nv latet staen
 Doe quamense alle ende wopen lot
- 3080 Om ihesus cleder al was hi got
 Ende met hem maectense haer spot
 Si waren onwerdich ende sot
 Doe riep elc iode al met sire cracht
 Man quite di seluen of du macht
- 3085 Of du best god dijn anxt es groet
 Quite di seluen van derre noet
 Du heefs soe vele vertuut gedaen
 Quite di vanden cruce saen
 En doedijt niet dat gi hier hoert
- 3090 Man wi seggen di bat voert
 Dan en weten wi niet man dat du best
 God. no gods sone. no heilich kerst
 In meneger manieren in meneger wijs
 Rampenerdense gode van paradijs
- 3095 Maer hi en antwerde hen niet en twint
 Hi was oetmoedich als .j. kint
- dle dief die hinc ter slinkerhant
 Rampenerde ihesum al te hant
 In derre manieren in derre wijs
- 3100 Rampennerde hi ihesum van paradijs

- Man du seits dattu god waers
 Hoe comt dattu hier dus veruaers
 Eest dijns willen eest dijns dancs
 Dattu hier met ons verhancs
 3105 Du waers gewone te doen genade
 Soe wien. di quam te rade
 Helpe di seluen laet dandere staen
 Ende ons met di laet quite gaen
 Du die wilen miracule daets
 3110 Nu eest tijt dattu di seluen beraets
 Nu soutu weten bestu god
 Quite di seluen sonder spod
 Nu heefstu noot quite di seluen saen
 Ocht ons metti wi sijn ontdaen
 3115 Mi heeft wonder waertoe dattu laets
 Dattu dus di seluen haets
 Dattu di niet en quijs van derre noet
 Di ende ons. onse pine es groet
 Waertoe hancstu hier soe naect
 3120 Man waertoe bestu soe verraect
 Dat ic di segge du swigs al stille
 Du gebeers al oft ware dijn wille
 Waerstu god ende heilich kerst
 Dat grote torment daer du in best
 3125 Het soude te nieute werden saen
 Waert waer du liets ons quite gaen
 Men mach hier groet wonder sien
 Du seits du wists dat soude gescien
 Waer omme doechstu dan dit seer
 3130 Ane di en gelouic nemmermeer

 dIt horde de dief ter rechter hant
 Ende antwerde sinen geselle te hant
 Geselle seit hi du best sod
 Dattu dus spreks tot dinen god
 3135 Ic ontrade dattu wel sere
 Dit arnen souts van onsen here

- Dat machtu sien an sijn gelaet
 Dat niet en es om sine mesdaet
 Hi es suete dat hi swicht stille
 3140 Daer bi wetic dat het es sijn wille
 Dat hi met ons dus es verdaen
 Dat heeft hi al om dat gedaen
 Dat hi wilt te sinen wille
 Breken rouen donreine hille
 3145 Geselle ic seg di oppenbaer
 Ic wilt oec weten ouerwaer
 Dat hi dese pine heeft vercoren
 Om siin volc dat es verloren
 Ic ende du hebben mesdaen
 3150 Die onwet hebben gedaen
 Met groten rechte waren wi geuaen
 Wet es. dat wi dus sijn verdaen
 Wi minden alle ledichede
 In ons was alle onsuerhede
 3155 Dien wi mochten daden wi quaet
 In ons beiden was ouerdaet
 Bedie dat men ons dus vent
 Recht es dat wi dogen torment
 Recht es dat wi siin verdaen
 3160 Dat en sate niet wel liet men ons gaen
 Maer mi ontfarmt dese man
 Inden welken niemen venden en can
 Sonde mesprijs no dorperhede
 Onmate noch behagelhede
 3165 Houerde felheit no scamp
 Maer al dat selue dat in een lamp
 Mi ontfermt meer sine pine
 Dan de dine of dan de mine
 Die hi hier doghet sonder plecht
 3170 Sonder verdiente ende sonder recht
 Maer dat heeft mi herde vertroest
 Datter omme sal siin verloest
 Menege ziele die es in de helle

- Die sere heeft haren onwille
 3175 Geselle wi waren beide fier
 In ons was prijs ende groet dangier
 Dat mach ons rouwen vele sere
 Dit weet algader onse here
 Gheselle en wetti selue wel
 3180 Dat wi en geerden niet el
 Dan stelen ende liegen
 Wijf ende oec man bedrieghen
 Die dit iaecht eest man eest knecht
 Dat es vonnesse ende recht
 3185 Dat menne iaghe ende va
 Dat men anden cruce sla
 Dese sonden berouwen mi
 Vele sere dat seggic di
 Dats mi berouwet dat dunct mi goet
 3190 Inne weet geselle oft du oec doet
 Nu salic bidden desen man
 Met al mire herten dat ic can
 Dat hi gehore mine tale
 Want hi es god dat wetic wale
 3195 Ay god seit hi geweldich here
 Mine sonden rouwen mi sere
 Al hancstu met ons dieuen hier
 Du en waers dief no pantenier
 Geweldich god dattu hier hancs
 3200 Dat es dijn wille dat es dijn dancs
 Dijn oetmoedichede es soe groet
 Dattu doechs dese bitter doet
 Ane dat cruce om onsen wille
 Ende om de ghene die sijn in de helle
 3205 Ay god geweldich here mijn
 Ochtic dorste soe coene sijn
 Dat ic di ghenade bade
 Hoe gerne quamic di te rade
 Ochtic mochte die hande mijn
 3210 Ontbenden hoe saen ic soude sijn
 Gevallen voer dine voete here

- Want mine sonden rouwen mi sere
 Ghi sijt genadich ende soe goet
 So wat dat enich man mesdoet
 3215 Berouwes hem wilt hijs af staen
 Here gi vergheuet hem saen
 Here mine sonden rouwen mi
 Ic wilre afstaen dat seggic di
 Ochtu noeyt miracule dades
 3220 Dattu mi nv saen berades
 Ic aensie die wile dat mijn lijf int
 Soe node benic in dit tormint
 Oetmoedich god van hemelrike
 Dine pine doegs om arme ende rike
 3225 Gehore mi in derre noet
 Mijn herte cliuet ic ben doet
 Here gehore die bede mijn
 Doer oetmoet so biddix di
 Die in sonden es beuaen
 3230 Wilt hijs berouwenesse hebben saen
 Wilt hijs afstaen comt hijs te rade
 Dat gi hem selt doen genade
 Ghi sijt god marien sone
 Ghi selt sijn eer heden noene
 3235 Met groter bliscap inden trone
 Met uwen vrienden die sijn so scone
 Dies biddic di geweldich kerst
 Gedincke mijns al daer du best
 Dat daer moete die siele mijn
 3240 Met di sijn dies biddic di
 Dat daer heden mine siele
 Metten inghel sente michiele

 gOd onse here horde al toe
 Hoe en die man anbedde doe
 3245 Geselle ic segdi al oppenbaer
 Ende oec al ouer waer
 Gewarich biechtere so bestu
 Om tgroet berouwenisse dattu hefs nv

Wes in hoghen ende niet en claghe
 3250 Du salt heden desen daghe
 Met mi sijn int paradijs
 Dat seggic di nv blide sijs
 Te goeder tijt waerdi geboren
 Dat ghi ten trone selt sijn vercoren
 3255 Hadde v geselle aldus gedaen
 So waer hi met ons beiden saen
 An di geselle mach menich man
 Nemen dicwile boeken an
 Dattu soe vele quaets hefs gedaen
 3260 Ende du soe salich best so saen
 Inne mach nimmer seggen te di
 Soe sere steken die nagehe mi
 Mijn adem cort mijn herte es seer
 Onse here en seide nemmeer
 3265 Dat dus die dief sijn sonden lijdde
 Dat was omtrent middachtide

dOe quam maria onse vrouwe
 Met groten sere met bitteren rouwe
 Ende dewangeliste sinte jan
 3270 Quam met als een serich man
 Daer ihesus anden cruce hinc
 Al was hi god ewelic coninc
 Maria claghede vele sere
 Gode onsen lieuen here
 3275 Inder manieren in derre wijs
 So groette se haer kint van paradijs
 Lieue kint twi hancstu hier
 Du en waers dief no pantenier
 Lieue kint wie was soe bout
 3280 So fel so fier so quaet so stout
 Dat hi di an dit cruce hinc
 Ia en bestu een ewelijc coninc
 Lieue mochtet yet gescien
 Dat mijn oghen mochten di sien
 3285 Vanden cruce verloest

- Ia en bestu alder werelt troest
 Lieue kint du hancs hier als .j. dief
 Ic hadde di vtermaten lief
 Ic sie dijn doet ic sie dijn inde
 3290 So rouwech en was nie moeder van kinde
 Gabriel hi troeste my
 Lieue. als hi boedscapde dy
 Maer segghen hi mi dies niet en woude
 Datmen di dus crucen soude
 3295 Ic maecte mi hoghelijc ende blide
 Als hi di boedscapde in dien tide
 Dies en gewaechde hi niet en twint
 Hiettijt hem vele lieue kint
 Lieue here als ic di droech
 3300 Dicke speeldic ende loech
 Dat ic daer toe was vercoren
 Dattu van mi wouds sijn geboren
 Nu benic een dat serichste wijf
 Die nie ter werelt ontfinc lijf
 3305 Als ic di droech vele lieue kint
 Met alden lieden wasic gemint
 Wie sal mi nv doen goet ende ere
 Als du doet best lieue here
 Al hadstu mi daer toe vercoren
 3310 Dattu van mi wods sijn geboren
 Ic was een v dienst wijf
 Du daeds mi groet eere al mijn lijf
 Ic horde dicke gabriele
 Dinen bode ende inghele vele
 3315 Die wijsde ende troeste mi
 Lieue here dat was om di
 Als du waers jonc du en waers niet fel
 Mi bequam sere wel dijn spel
 Dies du en dades negeen dinc el
 3320 Maer minen wille daetstu wel
 Hadstu hongher ofte dorst
 Lieue ic gaf di mine borst

- Suete here als du mochs gaen
 Dat ic di biet was saen ghedaen
 3325 Nu en hetic v dinc nemmermeer
 Ic sie di steruen dats mi groet seer
 Dies gedinct mi lieue here
 Dat ic met rouwe no met sere
 Nie en was beuaen als ic di droech
 3330 Maer dicke speeldic ende loech
 Lieue kint als ic van di gelach
 Hoe wel icx mi behaghen mach
 Dan en haddic rouwe no seer
 Salic di spreken nemmermeer
 3335 Nenic wanic dats mi groet seer
 Du hads gesproken waric comen eer
 Lieue kint du en hads niet .ij. jaer
 So maecte die coninc herodes maer
 Dat hi di gerne soude verslaen
 3340 Doen vloecht ic di in egypten saen
 Nu en canic di gehulpen niet
 So wat tormente dat di gesciet
 Oemoedich here ewelic coninc
 Nu eest waer ende ic onderuint
 3345 Lieue kint als du laegs bi mi
 Dicke helsdic ende custe di
 Salic alsoe doen nemmermere
 Segge mi ic bids di lieue here
 Dat symeon die oude man
 3350 Mi seide vore den tempel dan
 Maria moeder maghet ionvrouwe
 Du salt noch hebben bitteren rouwe
 Van dinen kinde dat gi hier siet
 Lieue kint nv eest gesciet
 3355 Al droeghic di du waers mijn here
 Du daets mi nochtan emmer ere
 Geweldich here oetmoedich kint
 En haddic di niet so sere gemint
 Soe en haddic niet so bitter seer
 3360 Salic di cussen nemmermeer

Nenic niet dat wetic wel
 Want die ioden siin so fel
 Sagense mi comen te di
 Si souden saen trainen mi
 3365 Dat loefdic gherne lietmen di gaen
 Dat men mi trainde saen
 Lieue kint en es dit iammer groet
 Dat ic di die bitter doet
 Sie gedogen voer mi
 3370 Ende inne dar lude clagen di
 Met rechte clagic dijn seer
 Kint en gewinnic nemmermeer
 Inne dar om di lude suchten
 Dat die ioden horen mochten
 3375 Also wel mochtic swigen stille
 Als claghen lieue dinen onwille
 Swighen arme hoe mochtic swigen
 Kint en wanic meer gecrigen
 Dorstic di lieue comen so bi
 3380 Dat ic die voete taste van di
 Dat mi die ioden niet en saghen
 Hoe sere soudic di dan clagen
 Mochtic tasten die naghele groet
 Die di bringhen toter doet
 3385 Die di steken in die voete
 Al dorentore vele onsoete
 Tasten. och erme ofticse taste
 Wat holpt si staen soe vaste
 Si sijn so lanc so swaer so groet
 3390 Sie bringhen dine herte ter doet
 Lieue minne nv en magic nemmeer
 Spreken om dit grote seer
 Dat in mi es om dinen wille
 Mijn herte ontsinct mi al swigic stille
 3395 Nochtan lieue kint dorstic gaen
 Tote di ende bi di staen
 Clagen tvernoey dat di es gedaen

- Soe soude mijn herte sonder waen
Te haer seluen weder comen saen
3400 Nenic en dert niet ane gaen
Saegmen mi men soude mi vaen
Men soude mi cruce sonder waen
Dit loefdic vele gerne saen
Wildemen di nv laten gaen
3405 Dorstic nemmer sijn so bout
Dat ic de ioden dus sie so stout
Geloefdic seluer ofte gout
Dat sie mi hinghen an dit hout
So menic lieue dat si di lieten gaen
3410 Vanden cruce saen
En wilden si oec dit niet ontfaen
Dat si quite di lieten gaen
So wildic wesen sonder waen
Anden cruce met di verdaen
3415 Ende oec met di hedemeer
Moeste deilen al mijn seer
Lieue minne du swijchs al stille
Hoe sere hefstu dinen onwille
Mochstu spreken ende gaen
3420 Hoe soete soudstu antwerden saen
Dinen noet die ic dus sere claghe
Ende al lieue kint dat ic di vraghe
Nu en moegdi antwerden no spreken
Dat doen die naghele die .v. steken
3425 Lieue kint dies gedincket mi
Dat drie coninghe omme di
Quamen van verre di sien
Ende sie tot bethleem gien
Ende daden offerande menichfout
3430 Mirre wieroec ende gout
Doe wasic blide als dat geschiede
Nv es mijn herte al of si briede
Lieue minne hoe swert es dijn mont
Hoe groet torment heefstu becont
3435 Hoe bebloet siin dine hande

- Hoe stijf siin dine witte tande
 Hoe siin dijn hande ende dine voete
 Doergaet genichelt vele onsoete
 Hoe sepelinghe rent dijn bloet daer wt
 3440 Ute diere witter huut
 Lieue minne twi seidic dit
 Ic seide dine huut ware wit
 Al wasse wit si es nv swert
 Vele stijf cout donker ende hert
 3445 Lieue minne gheweldich here
 Met groten rechte clagic di sere
 Hoe valu siin die leppen dine
 Die hem dicke voegden an de mine
 Waer siin die claer ogen geuaren
 3450 Die claer als een carbonkel waren
 Lieue minne saelt nemmermeer gescien
 Dat sie op mi selen sien
 Stijf siin dijn vinghere ende dijn hande
 Gelu siin dijn witte tande
 3455 Lieue here lieue minne
 Dat wanic wel in minen sinne
 Dorstic di nemmer comen so bi
 Di souts te saechter sijn ende mi
 Dese naghele nichelen di so sere
 3460 Hoe mach v saechte siin lieue here
 Du en mach spreken horen no sien
 Noch du en caens der doet niet ontvlien
 Lieue here du waers soe scone
 Nu hebdi ene scarpe crone
 3465 Die di perst die di torment
 Datter bloet sepelinghe vte rent
 Al dattu doechs al dat di deert
 Gaet mi so na ter herten wert
 Soe rouwich es si datmen v doet
 3470 Dat sie met rechte mach wenen bloet
 Men seit so salt doen emmermeer
 Daer ogen daer lief daer hant ende seer
 Al en der di niet tasten mine hant

- Die pine die du doechs al te hant
 3475 Die doegic lieue dat seggic di
 Al dijn vernoy es binnen mi
 Lieue minne du waers so vroet
 Ic wane dine doet betekent goet
 Bloeme du wets al dat gesciet
 3480 En waert niet waer du en doges dit niet
 Du hefs selue dese doet vercoren
 Om diin volc dat es verloren
 Bloeme dit heeft mi vertroest
 Datter bi sal siin verloest
 3485 Meneghe siele die moest in de hille
 Hier bi wetic dat het es dijn wille
 Bloeme hoe mochtic serich sijn
 Ic droech di ter herten mijn
 Bi di selen die siin verloren
 3490 Van eerst werden gheboren
 Aey adam vele sondich man
 Waertoe waerstu so gierich dan
 Dattu braecs mijns kins gebod
 Die was dijn here ende dijn god
 3495 Ay adam dat mijn lieue kint
 Dy ende dandere soe heft gemint
 Dat hi doecht dese better doet
 Om dinen wille dats iammer groet
 Iammer arme wat seggic nv
 3500 Lieue bloeme en belgt niet v.
 De grote rouwe dede seggen mi
 Dienic doege lieue om di
 Ic soude seggen dine doet
 Es alder werelt bliscap groet
 3505 Dine doet sal dine creature
 Quiten uten helschen were
 Lieue bloeme lieue minne
 Ic sie dijn hoeft ende dinen kinne
 Vallen op dijn scouderen nv
 3510 Lieue minne wat gedoechstu
 Lieue minne nv en magic nemmeer

- Di claghen v wel better seer
 Dat doe ic om dinen wille
 Die maecht maria swech al stille
 3515 sEnte jan ewangeliste
 Die bi haer stont, als hi dit wiste
 Dat maria claghede onsen here
 Die stont ende weende vele sere
 Hi seide maria moeder maegt
 3520 Weest blide ende niet en claegt
 Dat gi daer toe waert vercoren
 Dat dese here wilde van di sijn geboren
 Maria gi waert ter goeder tijt
 Geboren dat gi moeder sijt
 3525 Dies heren die sal te sinen wille
 Breken rouen donreine hille
 Vrouwe suicht ende sijt nv blide
 Gi selt sien in corten tide
 Dat alle onse vriende die sijn verloren
 3530 Ten euschen paradise selen comen
 Gi sijt alder werelt vrouwe
 Laet wesen desen bitteren rouwe
 En dogede ihesus niet dit bitter seer
 Ziele en worde blide nemmermeer
 3535 Nu selen onse vriende ende onse mage
 Sonder twiuel eer iij. daghe
 Blide siin inden hoghen trone
 Met groter bliscap vele scone
 Daer selen sie wesen euwelike
 3540 Metten inghelen hoghelike
 Maria en meslaet v niet
 V kint het weet al dat gesciet
 Laet v. wenen ende swijcht al stille
 Dit doecht hi om die sijn in de hille
 3545 Lieue vrouwe suuer maecht
 Dit grote seer dat gi hier claecht
 Sal menegen ledegen vander doet
 Die nv sijn in pine groet

- Ghi sijt porte van paradijs
 3550 Gi sijt soe vroet ende soe wijs
 Troest gi v seluen lieue vrouwe
 Laet bliuen desen bitteren rouwe
 Mi doet leede v grote seer
 Sente jan hi en seide nemmeer
- 3555 iHesus onse lieue here hi hoerde al toe
 Hoe en sijn moeder clagede doe
 Ende hoe de goede sinte jan
 Siere moeder troest al daer hi can
 Als hi dit horde ende sach
- 3560 Sprac hi soe hi oetmoedelecst mach
 Lieue moeder suete vrouwe
 Ic hanghe hier met groten rouwe
 Al hangic an dese cruce hier
 Ic en was dief no pantenier
- 3565 Gisternauont wasic gesocht
 Ende verraden ende vercocht
 Doen gheselde men mi onsaechte sere
 Die ioden al wasic haer here
 Lieue moeder en meslaet v niet
- 3570 Dit torment dat ghi hier siet
 Dogic om der gheender wille
 Die nv barren in die hille
 Ia en heuet v jan niet geseit
 Die hier bi v staet en screyt
- 3575 Waer omme ic doge dese bitter doet
 Daer na sal comen die bliscap groet
 Lieue moeder lieue trouwe
 Alder werelt moeder ende vrouwe
 Nu saelt mijn volc hebben bekint
- 3580 Dat ict met trouwen hebbe gemint
 Dat ic om hem dit seer desen noet
 Gesmake. ende dese bitter doet
 Moeder en mach niet meer tedi
 Spreken. mijn herte ontsincket mi
- 3585 Ane di moeder nemic orlof
 Die di eert hebben minen lof
 Die di weerd die di doet eere

- Hi sal int paradijs wesen here
 Die di vleiet hi es vroet ende wijs
 3590 Want du best porte van paradijs
 So wie sal in hemelrike
 Eest pape eest leec. arm oft rike
 Metten inghelen blide sijn
 Dat selen doen die gebode dijn
 3595 Dit leen lieue moeder dit geuic di
 Dattu heefs ghehoert van mi
- eNde du jan getrouwe vrient
 Die mi dicke wel heefs gedient
 Mire moeder beuelic di
 3600 Alsoe lief als du hefs mi
 Te comen bouen inden trone
 Ende daer met mi te sine scone
 Eere mire moeder met al dire cracht
 Nem ware te hare al dattu macht
 3605 Doet haer te eren al dine machte
 Dan saltu leuen ewelike sachte
 Gi sijt beide suuer ende maecht
 V. geselschap mi wel behaecht
 Ian ic segdi ouer waer
 3610 Sekerlike ende oppenbaer
 Soe wie mire moeder doet ere
 Hi sal int paradijs sijn here
 Met siere moeder in derre wijs
 Beualse ihesus van paradijs
 3615 Soe wiet es eist man eist wijf
 Hi sal hebben dewelike lijf
 Hier ane souden wi alle leren
 Dese vrouwe souden wi alle eren
 Die dus die goede sinte jan
 3620 In siere hoeden ontfinc dan
 Ia en hordi niet wat onse here seide
 Wat hi vore sinte janne leide
 Dat niemen en soude sijn so wijs
 Die quame int paradijs
 3625 Hi en dade der maghet van hemelrike
 Eere. ende lof een yeghelike

- hEt was noene doe god onse here
 Gaf enen roep lude ende sere
 Sijn torment ende sijn anxt was groet
 3630 Die naghele stakene ter doet
 Hi suchte hi beuede hem was onsachte
 Sijns selfs inde hoepte hi ende wachte
 Daer hi inden anxt groet was
 Met rechte was hi worden las
 3635 Sijn herte cloef ende ontsanc
 Die bitter doet hem herde dwanc
 Doe sprac ihesus wel iammerlike
 Dese tale ende wel oetmoedelike
 Ay seit hi hoe sere dat mi nv dorst
 3640 Te drinckene dat mi nv sere lust
 Hoe gherne soudic drincken
 Mijn herte wilt mi ontsincken
 Als hi dit seide die ioden alle
 Brachten edic geminct met gallen
 3645 Ende maecten daer af enen dranc
 Die wel bitter was ende cranc
 Als dese dranc geminct was
 Sie brachtene ihesu die hinc wel las
 Ende settene hem an sinen mont
 3650 Daer hi vele dorstich stont
 Die galle dranc ihesus onse vader
 Ende seide hets ghedaen algader
 Als dese felheit was ghedaen
 Doe sprac hi dese tale saen
 3655 Vader seit hi vanden trone
 Die mi ane marien scone
 Sondes. daer ic was geboren
 Om te quitene die sijn verloren
 Wat laetstu mi in desen noet
 3660 Soe langhe. mine pine es groet
 Hoe gedoechstut lieue here
 Dat ic soe langhe in desen sere
 Ben beuaen des biddic di
 Dattu saen gheefs inde mi
 3665 Lieue vader ontferme v mijns

- Oec biddic v ontferme v sijns
 Die mi nichelden in desen sere
 Ic vergheeft hen lieue here
 Die mi hebben dus verraden
 3670 Ic vergheeft hen algader
 In dien dat sie aldus selen doen
 Die ieghen dandere selen mesdoen
 Vader ic beuele di te hant
 Minen gheest in dine hant
 3675 Ic bidde v dat gien moet ontfaen
 Als hi wtgheet nv vele saen
 Als ihesus dit ghesprac
 Sine soete herte gaf enen crac
 Sine aderen scorden siin hals brac
 3680 Die bitter doet hem stappans stac
 Daer versterf die menschede
 Maer niet sine godlijchede
 Dat wi weten ouer waer algader
 Dat was heilich gheest sone ende vader
 3685 aLse dus versceden was onse here
 Die erde beuede stappans sere
 Donker wert ouer al
 Die bossche beueden ende ertrike al
 Die sonne liet haer scinen staen
 3690 Die stene clouen alle saen
 Al die werelt werts geware
 Die ioden wordens alle in vare
 Die bome droegden alle na ende verre
 Haer scinen liet elke sterre
 3695 Die gordine die inden tempel hinc
 Scorde. stappans ende elke dinc
 Wisselden te diere wilen haer nature
 Sine doet vernam elke creature
 Ay hier ane souden wi alle leren
 3700 Te desen souden wi ons bekeren
 Onsen here souden wi eren
 Sine werdicheit souden wi meeren
 Dit was onse here deuwelike vader

Die hem seluen hier in algader
 3705 Brachte. om die waren verloren
 Dese doet hadde hi vercoren
 Dit dogede hi om enen iegeliken
 Die enege god van hemelrike
 Dit mach wel weten man ende wijf
 3710 Daer deen om den anderen geeft sijn lijf
 Als om ons dede onse here
 Die wi met rechte vleien ende eere

also pylatus dit bokin sach
 Dat hem wisselde die dach
 3715 Ende ouer al elke creature
 Wisselde haers selfs nature
 Ende dat die stene clouen saen
 Ende die sonne liet haer scinen staen
 Dat het doncker wert ouer al
 3720 Dat bossche beuede ende dal
 Als pylatus horde ende sach
 Hi riep wel lude ay lase o wach
 Men mach wel sien ende kinnen hier
 Dat dese man en was niet pantenier
 3725 Wat hebben wi alle kaitiue gedaen
 Twi hebben wi desen man verdaen
 Men mach wel an dit bokin sien
 Dat hi wiste al dat soude gescien
 Hi was godssone sonder waen
 3730 Dat doet hi ons bekinnen saen
 Wie es so dul ende soe sod
 Hine mach wel weten hi es god,
 Waert te doene dat es gedaen
 Doer mi en worde hi niet verdaen

3735 tEr vespertijt quamen si saen
 Die joden te pylatuse gegaen
 Ende seiden pylatus lieue here
 Wi bidden v doet ons allen ere
 Hoert ons tale dies bidden wi .v.
 3740 Wat wi willen segghen v
 Hier comt margen een hoechtide
 Dat wi alle souden sijn blide

Laet ons afdoen dese dieue
 Ende desen man soe doedj ons lieue

- 3745 [P]ylatus antwerde dit louic wel
 Die ioden stappans en doen niet el
 Maer gaderen hem alle saen
 Ende quamen te caluarien gegaen
 Daer ihesus anden cruce hinc
- 3750 Versceden hort ontfermelike dinc
 Twee dieue die bi hem hinghen daer
 Leueden noch al oppenbaer
 Te hen beiden quam een iode gegaen
 Ende brac haerrer beider been saen
- 3755 Ons heren been en brac hi niet
 Dien hi doet verstoruen siet
 Doe quam longius gegaen
 Met enen scarpn spere saen
 Ende stac dat spere in onsen here
- 3760 Die was gewont ende wondene mere
 Vter wonden quam gegaen
 Water ende bloet vele saen
 Daer dat water ende dat bloet ran
 Opten steen dat hi cloef dan
- 3765 Alsoe als yeue dat ierste wijf
 Van adams siden ontfinc lijf
 Alsoe wert de heilighe kerke geboren
 Van ihesus siden die was verloren
 Om dat dat water ende dat bloet ran
- 3770 Wt ons heren siden dan
 Om dat es daer water geminct
 Ende wijn daer men messe nie sinct
 Longius hi en lette niet
 Alsoe als pylatus hiet
- 3775 Hi quam te hen allen drien geuaren
 Die anden cruce verdaen waren
 Hi nam alle drie die cruce saen
 Ende heffese vter erden saen
 Die cruce bleuen liggende op derde
- 3780 Longius hi ginc sire verde
 Daer bleef liggende ihesus op derde

Al doet ende vele onwerde

- bInnen der stat was een goet man
 Die ioseph hiet inden tide dan
 3785 Al was hi iode. vroech ende spade
 Badt hi gode stillekine genade
 Hi nam dat in groten sere
 Dat men dus werde gode onsen here
 Die ioseph hi quam genaen
 3790 Pylatus viel hi te voeten saen
 Ende seide pylatus lieue vrient
 Dicke hebdi mi wel gedient
 Ocht gi mi liet hoe gherne ic name
 Die hem god hiet dies mans lichame
 3795 Pylatus seide dit louic wel
 Wi sijn gevriende al badi el
 Wildi margen wildi nv
 Al te gadere hebtene .v.
 Ioseph was blide hi en lette niet
 3800 Als hem dit pylatus hiet
 Nichodemus was oec een goet man
 Ende quam met ioseppe gelopen dan
 Doe quamen saen dese twee manne
 Tote den ewangeliste sinte ianne
 3805 Ende tonser vrouwen sente marien
 Eere coninginne vrien
 Si seiden dat hen pylatus dede dese ere
 Dat hi hen den lichame van onsen here
 Hadde gegheuen te haren wille
 3810 Als si dit horden si sweghen stille
 Blide was maria ende sinte jan
 Nichodemus ende ioseph dan
 Ende ginghen alle viere saen
 Daer ihesus lach anden cruce verdaen
 3815 Als daer dese geselschap quam
 Ioseph in sine hant ene tanghe nam
 Die tanghe was suuer ende rene
 Als daer toe hoerde ende clene
 Die naghele die stac in ihesus voete
 3820 Die trac hi ute vele soete

Ende die in sine hande staken dan
 Die trac hi ute soe hi best can
 Doe quam ioseph ende nychodemus
 Al dus ontnichelt was ihesus
 3825 Ende onse vrouwe ende sinte jan
 Die namen onsen here dan
 Ende hieueene vanden cruce sachte
 Dese viere daden al hare machte
 Onse vrouwe begonste te wenen onsachte
 3830 Ende wert van rouwen harde onmachte
 Sie wranc haer hande ende suchte sere
 Sie clagede iammerlike onsen here
 Haer was wee ende vele onsachte
 Sie droechde ihesus wonden sachte
 3835 Doen sprac maria onse moeder ende vrouwe
 Met groten sere met bitteren rouwe
 Mijn herte droech di lieue here
 Wat wonder eest al suchtic sere
 Doen nam maria balseme soete
 3840 Ende saluede die wonden an sine voete
 Ende in sine hande ende in sine side
 Dit dedse gherne al wasse onblide
 Doe namse ene witte dwele
 Die sinte ian daer bi hilt gerne
 3845 Ende wonden daer in onsen here
 Wel suerlike met groten sere
 Ioseph hadde des nachts gewaket
 Ende hadde een scoen graf gemaket
 In enen witten merbelsteen
 3850 Alsoe clare als een yvorijnbeen
 Dat graf was in enen lochtene dan
 Daer en quam wijf no man
 Doe quam ioseph ende dandere man
 Onse vrouwe ende sinte ian
 3855 Dese viere namen onsen here
 Ende leidene in een graf wenende sere
 Doe namense enen groten steen

Die swaer was claer als yuorbeen
 Ende leiddenne op dat graf ende recht
 3860 Dese daden ihesuse al sijn recht
 Als dese viere dit hadden gedaen
 Si namen an ihesuse orlof saen
 Ende hadden claghen vele groet
 Om onsen here die daer lach doet
 3865 Als sie waren in dese claghe
 Het was spade in goeden vriendaghe

sAterdaechs tilike saen
 Doe quamen vele ioden gegaen
 Te pylatus die in sine hant
 3870 Al die voegdie hadde int lant
 Doe sprac een iode pylatus here
 Hort onse tale doet ons ere
 Dese man die wi hier hebben doet
 Dus gedane wijs in derre noet
 3875 Die hier anden cruce es verdaen
 Dies hi onse wet verkeerde saen
 Lieue here men doet ons verstaen
 Dat hi seide daer hi stont geuaen
 Dat hi derdages risen woude
 3880 Ende weder leuen soude
 Lieue here of ghijt gebiet
 Gerne baden wi v of gijt riet
 Dat gi dadet hoeden sijn graf
 Sone souden wi twint sorgen daer af
 3885 Want hi was een bedecket man
 Comen sine iongheren dan
 Ende stelene soe siin wi ontdaen
 Here doet sijn graf hoeden saen
 Dat comt ons wel in onsen moede
 3890 Riset hi dat sal sijn sonder hoede
 Comet dus alst oec wel mach
 So en sagen wi nie soe droeuen dach
 Mogenne sine iongeren vte stelen
 Ende mogen siet ons verhelen
 3895 Soe selen sie seggen verre ende bi

- Dat hi dus verresen si
 Dan sal ons die rouwe deren meer
 Danne wi hadden laten gaen eer
 Pylatus antwerde den ioden saen
 3900 Waeromme souden wi hier omme sijn ontaen
 Hebt orlof ende sueket dien gi wilt
 Dese vrese heb ic v saen gestilt
 Doet wapenen ridderen die gi wilt
 Felle ende starke soe hebdi gestilt
 3905 Doe se ligghen op sijn graf
 Dat sie niet en sceden daer af
 Soe comt dat die derde dach leden si
 Desen orlof hebt van mi
 Die ioden quamen alle gemene
 3910 Ionghe ende oude groet ende clene
 Ende riepen here gi segt wale
 Ons becomt wel uwe tale
 Hebt groten danc ende lof
 Dat gi ons gheeft desen lof
 3915 Die ioden en daden saen niet el
 Maer wapenden .iij. ridderen wel
 Ende leidense op ons heren graf
 Daer sie niet en scieden af
 Maer als die derde dach leden ware
 3920 So soudense sijn sonder vare
 Nu laghen iij. gewapende man
 Ende hoedden ons heren graf dan
 Dat sine iongheren niet en quamen
 Ende dat sijs niet en namen
 3925 Ende sie niet en maecten mare
 Dat ihesus verresen ware
 Ons heren passie hebdi gehoert
 Sine op verrisenesse hort nv voert
 Tierst hort hoe hi brac de hille
 3930 Ende sine vrient loeste te sinen wille

Vanden levne ons Heren [3931-4937]

dIe hille staet in een dal
 In derre wijs als ic v seggen sal

- Daud die prophete ons orconde gheeft
 Dat die hille twe stade heeft
 3935 Dene stat bouen. dandere onder steet
 Beide siinse stinckende ende leet
 Die onderste stat es iammerlike
 Alsoe sal sie wesen ewelike
 Daer es suchtinghe rouwe ende bitter seer
 3940 Daer weent men ende crit emmermeer
 Daer es carminghe emmer ende hantgeslach
 Daer eist vroech ende spade altoes nacht
 Elc kaitijf roept al dat hi mach
 Twi werdic ie eylaes o wach
 3945 Daer es onder vlamme ende vier so heet
 Dat elken kaitijf es ghereet
 Waer hi in enen iseren berch gedaen
 Hi gloeide ende smolte saen
 Bi dien viere staet ene beke
 3950 So cout so swert so grueleke
 Half die zee waer sier in gedaen
 Sie veruorse te yse saen
 In dat vier dat daer es so heet
 Hanghen ketele wel ghereet
 3955 Daer sonder inde kaitiughe zielen
 In barren wallen ende wielen
 Ende in die coude swerte beke
 Tormenten zielen eweleke
 Die beke es bitter als venijn
 3960 Hoe wee es hen dier inne sijn
 Nu sijn sie int hete vier
 Dan worpt mense in die beke onghier
 Dit torment dit bitter seer
 Doeghen daer die kaitiue emmermeer
 3965 Nu wallense in dat pec ewelike
 Dan badense in die coude beke
 In dit vier in dese beke
 Sijn si sonder inde eweleke
 Daer bi es vele onghiers

- 3970 So groet stanc so vele ondiere
 Padden slanghen sarpente draken
 Die sielen te verslindene si haken
 Die tote nv in dat pec wielen
 Ende daer tormenten sere hare zielen
- 3975 Die kaitiue die daer sijn verloren
 Roepen twi worden wi ye gheboren
 Sondeghe onsaleghe vermesamt lijf
 Dat crit vele lude elc caytijf
 Die slanghen ende die sarpenten
- 3980 Hebben in de helle dese renten
 Dat si den kaitiuen al in een
 Sughen dmarch wt haren been
 Daer bi es soe groten stanc
 So wl so better so stinkende cranc
- 3985 Dat tonghe vertellen niet en mach
 Die daer sijn criten nacht ende dach
 Daer woent in dat wl ondier
 Als die vissche int water hier
 Die zielen die daer in sijn
- 3990 In desen stanc in dit venijn
 Sie criten sie suchten al in een
 Dit lijf hebbense ende el negeen
 Niet lijf maer die bitter doet
 Die daer es sonder inde groet
- 3995 Dats emmer doet al sonder lijf
 Daer en leuet gheen caitijf
 Voert so sijnse vele onghedwelte
 V^c. hamere op aenbelte
 Die daer sonder inde slaen
- 4000 Dit horen si alle sonder waen
 Vroech ende spade nacht ende dach
 Daer crit men aylase o wach
 Voert eyst so donker ende so swart
 So stinkende gruelijc ende so hart
- 4005 Dat men donkerheit tasten mach
 Soe groet torment nie man en sach

In die dicke donkerhede
 In die swarte caitiuchede
 So crit elke siele ay lase caitijf
 4010 Twi wardic ye vele sondich lijf
 Maer voert so ligghen drake fel
 Die sonder inde en doen niet el
 Maer laten vte hare kelen gaen
 Vlammen ende vier vele ongedaen
 4015 Die vlamme es donker swert ende heet
 Sie es den sielen emmer gereet
 Inder felre draken kelen
 Sijn die caitiue ende emmer selen
 Daer sijn fornaeyse gloeyende heet
 4020 Langhe diepe wijt ende heet
 Daer staen die duuele emmer gereet
 Ende worpen die zielen in dat heet
 Daer haer die siele pijnt tonsculene
 Dan beghennen die duuele tulene
 4025 Ende hebben crauele vele gereet
 Vaste sware gloeiende heet
 Ende houden die caitiughe sielen
 Hen waer beter dat sie wielen
 Beter arme daer en es nemmer raste
 4030 No vroech no spade no dach no nachte
 Daer es torment ende bitter seer
 Sonder inde ende emmermeer
 Daer berret die moeder metten kinde
 Serichlike sonder inde
 4035 Daer en claecht die moeder niet haer kint
 Elc te claghene genoeg daer vint
 No de vader sinen sone
 Elc heeft daer genoeg te doene
 Daer en swijcht men nemmer stille
 4040 Daer sien die duuele haren wille
 Daer crit men daer sleet men die hande

- Daer sucht men daer criselen de tande
 Daer sijn de duuele alle stout
 Gierich wreet fel ende bout
 4045 Daer en helpt haue no gout
 Die daer siin sijn emmer out
 Daer es emmer hongher ende dorst
 Den kinde en hulpt niet der moeder borst
 Daer es die doet ewelike sonder lijf
 4050 Daer crit men aylase caitijf
 Die daer siin siin emmer cranc
 Hare beste werelt es wle stanc
 Wat magic segghen der hellen sede
 Daer es sonder inde caitiuchede
 4055 Dat orcont die ewangeliste
 Diet vernam ende wel wiste
 Dat elke siele die daer sijn sal
 Sal hebben ewelec ongheual
 Dit seit ons sinte gregorijs
 4060 Diere aue condich was ende wijs
 Dat daer elke siele sal ontfaen
 Loen. daer ieghen si heeft gedaen
 Dit seit die boec oec eist waer
 Dat elker sielen lichame daer
 4065 Sal met haer sijn in dit seer
 Sonder inde ende emmermeer
 Dat orcont ons sinte augustijn
 Dat dien caitiuen die daer siin
 Langher duncket .j. halue wile daer
 4070 Dan ons hier .v^c. jaer
 Dit torment ende al dit seer
 Sal daer wesen emmermeer
 Dit sal al doghen sonder inde
 Elc die gode niet en minde
 4075 Die ieghen wet hebben gedaen
 Ende te rade niet hebben gegaen
 So wie tachterst wert verwonnen
 In mesdaet als in hoeft sonden

Ende dies berouwenesse niet en heeft
 4080 Al die wile dat hi leeft
 Al dit seer sal hi hebben swaer
 Ic wilt wel segghen ouer waer
 Dat en sal sijn coninc no graue
 Dat hem mach helpen sine haue
 4085 Maer verdinct hijs in dit lijf
 Hi en sal niet siin ewelijc caitijf
 No ionc no out no arm no rike
 Verdinct hijs hi en sal daer ewelike
 Man ende wijf leec ende clerke
 4090 Elc sal daer hebben na sine werke

dlet in sine herte venden can
 Hier mach hi nemen boken an
 Dat ene halue wile daer
 Es langher dan hier .v^c. iaer
 4095 Hier omme souden wi alle waken
 Hoe wi dat mochten gheraken
 Te doene. dat ons die felle draken
 In hare kele niet en saken
 Wi souden pensen in dit lijf hier
 4100 Om dit gloeyende vier
 Hoe daer die moeder metten kinde
 Berrent. ewelike sonder inde
 Elc soude dinken ionc ende out
 Om die beke die es so cout
 4105 Die swert es dicke als venijn
 Hoe wee es hen die daer in sijn
 Om die fornayse souden wi dinken
 Ende om die daer in sinken
 Om die ketele die daer in wallen
 4110 Om die caitiue die daer in vallen
 Wi souden pensen om dien stanc
 Die so wl es ende so cranc
 Wi souden vleien manlike
 Onsen here van hemelrike
 4115 Als wi verscieden dat onse siele

- In dat hete pec niet en wiele
 Ende wi moesten sijn so wijs
 Dat wi verdienden dat paradijs
 Dies moeten wi verdienen een ieghelike
- 4120 Dies onne ons god van hemelrike
 Die onderste stat hebdi gehoert
 Vander hillen nv hort voert
 Die onderste stat es sonder gront
 Maer dat doet ons sinte pouwels cont
- 4125 Dat die stat die bouen staet
 Es ganser nochtan essie quaet
 Binnen dier stat ende daer nae
 En scen nie sonne no mane
 Al en es sie niet so iammerlike
- 4130 Als donderste si es gruelike
 Daer eist donker ende swert
 Daer eist fel ende hert
 Daer en es bliscap no spel no sanc
 Daer es onghewormte ende wle stanc
- 4135 Wat mochtic segghen hier af meer
 Daer es vernoey torment ende seer
 Alle die ghene die daer sijn
 Verdrinken daer in dat venijn
 Hen dunct dat si nemmermeer
- 4140 En mochten comen in meerder seer
 Nochtan so eist men dan niet
 Ieghen dat seer dat onder gesciet
- BOuen in desen menderen sere
 Waren die dienden onsen here
- 4145 Patriarken ons heren vrient
 Propheten die hem hadden gedient
 In dese stat waren si alle gader
 Dochter moeder sone ende vader
 Alle die waren gheboren
- 4150 Die moesten wesen hier verloren
 Propheten menic ihesus vrient
 Die hem hier hadden gedient
 Dandere die oec onwettich waren
 Si voeren onder meneghe scaren

4155 Die doe daer bleuen ende noch sijn
 Alsoe onse here loeste de vriende sijn
 Ghehoert hebdi der hellen stade
 Die beide sijn wl ende quade
 Hort voert hoe ihesus daer toe quam
 4160 Datti sine vrient loeste ende nam

IHesus was int graf geleit
 Al soe alsic vore hebbe geseit
 Drie ridderen laghen vele wale
 Daer op gewapent datmen niet en stale
 4165 Sine lichame lach int graf vele stille
 Siin gheest hi quam voer die hille
 Als hi voer die hille quam
 Een cruce in sine hant hi nam
 Hi stiet die porte dat si boech
 4170 Ende dat si in stucken vloech
 Die claeheit sloech tote inden gront
 Daer ihesus voer die porte stont
 Daer nie licht en quam no meer en sal
 Nu quam daer claeheit ouer al
 4175 Die duuele alle in onmacht lagen
 Alsoe die grote claeheit sagen

ADam hi was deerste man
 Die ihesus comste bekinde dan
 Als adam die claeheit siet
 4180 Hi sprac op hi en lette niet
 Ende riep wel lude wle hille
 Du sals hebben dinen onwille
 Ic sie tkint dat es geboren
 Om de ghene die waren verloren
 4185 Van marien om onsen wille
 Nu saltu siin berouet wle hille
 Doe riep adam tonsen here
 Here seit hi hebt lof ende ere
 Willecome ons allen sijt
 4190 Ghi sijt comen ter goeder tijt
 Ic ben hier .v^c. jaer

Al seidic meer ic seide waer
 Vele cort gebonden lieue here
 Wel iammerlike met groten sere
 4195 Om mine mesdaet om v gebod
 Dat ic brac want gi waert god
 Om de grote ghierichede mine
 Hebbic gedoegt grote pine
 Ic beet den appel stillekine
 4200 Dat bebic gearent dats mi in scine
 Niet ic allene maer oec al v maghe
 Die hier doen meneghe claghe
 Ende elc man die nie was geboren
 Es om minen wille verloren
 4205 Here gi wet al dat gesciet
 Ia en wetti wel wiet mi riet

DOe quam noe die maecte de arke
 Ende was blide ende riep starke
 Willecome lieue here
 4210 Nu benic quite van desen sere

DOe quam gelopen abraham
 Als hi ons heren comst vernam
 Ende riep willecome vader mijn
 Nu salic int paradijs sijn
 4215 Doe quam jacob ende sine .xij. sonen
 Si waren blide ende coene
 Ende riepen alle willecome lieue troest
 Willecome wi sijn verloest
 Doe quam gelopen moeyses
 4220 Ende was so blide algader des
 Ende en mochs hem onthouden niet
 Hi loech sere als hi ihesuse siet
 Doe quam die coninc dauid gegaen
 Ende viel op ihesus voete saen
 4225 Ende riep sere lude ic nie en sach
 Te minen behoef soe bliden dach
 Binnen dien dat dese bliscap was
 Doe riep vele lude ysayas

- Nu is volwt mine prophetie
4230 Dies hebbe danc die maghet marie
Ende ihesus haer lieue kint
Dat mine scrifture es waer bekint
Doe quam ysayas ende loth
Ende daniel ende iacob
4235 Ende riepen here nv eest wel waer
Dat gelof es worden waer
Daer na quam malachiel
Iheremias ende iezechiel
Ende al ons heren vrient
4240 Die hem oeyt hadden gedient
Meneghe blide geselschap
Die om sine comst hadden bliscap
Doe quamen sie met menegher scaren
Ieghen ihesus comst gevaren
4245 Ende dancten alle onsen here
Dat hise verloest hadde van dien sere
Alse ihesus dus heeft vertroest
Sine vriende ende verloest
Hi begroetese soete ende wale
4250 Ende seide hen allen dese tale
Lieue vrient hebt minen verde
Ic ben v vader ende v herde
Lieue vrient om uwen wille
Hebic gedaen sere minen onwille
4255 Om v torment dat gi hadt groet
Hebic gesmaect die bitter doet
Ende om de gene die siin ende selen
Ic en weet hoe sijt mi lonen selen
Dat gi mi oeyt hebt gemint
4260 Dat seldi nv hebben bekint
Nu comet alle vele scone
Met mi bouen inden trone
Daer sijt met mi ewelike
In dat soete hemelrike
4265 Als ihesus dit hadde geseit
Elke ziele op sine voete leit

Ende weenden alle vele sere
 Van bliscapen die seide onse here
 Elc nam anderen bider hant
 4270 Ende volgden ihesuse al te hant
 Singhende hoghelike aldus
 Sanctus sanctus sanctus dominus
 Dies moeten wi hier alle verdienen
 Dat wise moeten horen ende sien
 4275 Die met ihesuse singhen dan
 Dies moete verdienen wijf ende man

Die duuele alle in onmacht lagen
 Van ihesus claerheit als sise sagen
 Als hen dit licht begonste ontgaen
 4280 Si stonden op vele sere ontdaen
 Deen nam stake ende brander
 Dandere craule de derde tangen
 Doe riepense alle wi sijn ontdaen
 Volghen wi onser priden saen
 4285 Die duuele riepen alle gemene
 Wach wach onse hille blijft allene
 Volgewi volgewi al te hant
 Slaen wi aen onse pride onse hant
 Si waren bitter alse galle
 4290 Si loeyden caeyinden vele sere alle
 Ende liepen alle vele sere
 Na die heilighen na onsen here
 Daer riep elc duuel al dat hi can
 Achter ihesus zielen dan
 4295 Quade liede ontbeit ons saen
 Ontbeit ocht wi selen v verslaen
 Vermarret achter wi volgen v
 Wi selen v steendoet slaen nv
 Si liepen hen halp niet
 4300 Elc was serich als hi dit siet
 Ende die meester duuel was
 Als hi van loepene moede was
 Hi seide gesellen staet al stille
 Laet mi nv doen al minen wille
 4305 Mi wondert herde wat manne dit es

Die der hem onderwinden des
 Hi en dunct mi geen eerds man
 Ic sal hem vraghen wat hi can
 Twi hi dus sinen wille
 4310 Heeft ghedaen in onse hille
 Hoe hi ons allen heeft veruert
 Sonder wapen ende sonder swert
 Lachter heeft hi ons gedaen
 Wiet es willic hem vraghen saen
 4315 Hi dunct mi condich ende fier
 Sonder orlof quam hi hier
 Doen riep die duuel tonsen here
 Horstut du does mi grote onere
 Dattu sonder orlof quames
 4320 Te mire hillen ende du names
 Mine zielen die metti gaen
 Ghi selse weder gheuen saen
 Al haddise noch also verre geleit
 Geefse weder eer enich sceit
 4325 Als dit die duuel hadde geseit
 Ihesus sprac ten sielen ontbeit
 Ic wille antwerden desen quaet
 Die mi dus toe spreect sonder raet
 Duuel seit hi. doe dat ic wille
 4330 Niet narre en comt ons staet al stille
 Dat ic quam voer dine hille
 Dat was mijns dancs ende mijn wille
 Het en besteet oec niet te mi
 Dat ix orlof name an di
 4335 Du en maegs mi verbieden niet
 Dat ic an dine porte stiet
 Du waers wilen claer ende scone
 Met mi bouen inden trone
 Ic ben dijn god ic ben dijn here
 4340 Ic werp di in desen bitteren sere
 Om dine grote behagelhede
 Warp ic di in dese serichede
 Here seit hi en cans gelouen niet
 Gi wet algader dat gesciet
 4345 Ghi segt waer ic was wilen scone

Met v bouen inden trone
 Ic was behaghel ende fier
 Daer om benic in de helle hier
 Nu hebdi mi verbolghen sere
 4350 Dat gi mi doet dese grote onere
 Dat gi dus reyne roeft mijn rike
 Dat daer en blijft no arm no rike
 Dat ghi mi nemt den seluen man
 Dien ic metten appel wan
 4355 Dat ghi mi al de ghene roeft
 Die ghi mi selue hadt geloeft
 Wat goeder rechtien es hi dan
 Die sijn gelof niet houden en can
 Al sidi god gi doet onwet
 4360 Ghi ontoet dat gi hadt geset
 Gi roeft mi dies al oppenbare
 Dat ic hebbe ghehad .v^c. iare
 Als adam die bi v staet
 Hadde ghedaen sijns wijfs raet
 4365 Soe dadi van hem uwen wille
 Ende worptene saen in mine hille
 Daer hi siin soude emmermeer
 In mijn torment in mijn seer
 Niet hi allene maer alle gemene
 4370 Man ende wijf groet ende clene
 Nu brecti dat ghi hadt geset
 Gi doet onredene gi doet onwet

 iHesus onse here antwerde gheeft
 Als die duuel geseit heeft
 4375 Duuel seit hi ic horde dine tale
 Dies willic di antwerden wale
 Ic ben god van hemelrike
 Ic gesciep al erterike
 Ic makede den nacht ende den dach
 4380 Ic maecte al dat lijf hebben mach
 Ic maecte water ende vier
 Daer na maectic alle dier
 Ic was ende emmer wesen sal

- Ic maecte den hemel ende ertrike al
 4385 Alsic al dit hadde gemaect
 Het dochte mi vele wel geraect
 Doe peinsdic bi mi seluen hier
 Du salt noch maken een dier
 Dat dier so maectic techterst dan
 4390 Dat dier dat was die man
 Den man haddic so gemint
 Met mi soe was hi wel bekint
 Ic maectene na die vorme mijn
 Also als noch alle manne siin
 4395 Dien seluen man hietic adam
 Daer hi sliep sine ene rebbe ic nam
 Van dire rebben maectic een wijf
 Ende hietse eua ende gaf haer lijf
 Desen wiue ende desen man
 4400 Gauic saen verstannesse dan
 Heerscap gauic hen oppenbare
 Ouer alle die diere die waren
 Ende al dat was op derde mijn
 Soude te haren gebode siin
 4405 Eene scone stad haddic gemaect
 Vele bequame ende wel geraect
 Binnen der stad soe waest so goet
 Dire binnen hadde sinen voet
 Hem dochte dat hi nemmermeer
 4410 En mochte siin in enich seer
 Alre hande bome settic daer in
 Die bome bloeyen nacht ende dach
 Soe soeten stad nie man en sach
 Daer en quam reghen no went
 4415 Daer riket emmer als pument
 In midden was een scoen priel
 Emmer groene altoes geheel
 Soe soeten stad no oec soe scone
 En sach nie man onder den trone
 4420 Daer wies vrucht van alre wijs
 Die stad was deertsche paradijs
 Alle die noeyt waren geboren
 Waren hier omme alle verloren
 Dit was dijn raet lede viant

- 4425 Dat ixē in de hille hadde gesant
 Onwert drake haddic ghewilt
 Ic hadde dese vaert al gestilt
 Dattu dus worues mine creature
 Al gader in die helle sure
- 4430 Ic ghehinghes het was voorsien
 Dat dit aldus moeste gescien
 Dat dus adam den appel beet
 Daer meneghe siele om heeft groet leet
 Die daer bliuen in de onderste hille
- 4435 Al hebben mine vriende haren wille
 Wie quaet al dunket di te vroech
 Het dunct mi tijt ende lanc genoegh
 Dat dine hille al gader sakede
 Mine creaturen die ic makede
- 4440 Dat die onreynē hille swelgen soude
 Al mijn volc ionghe ende oude
 Dies si swalch volcs soe vele
 Riepic minen inghel gabriele
 Ende loed hem ene blide boedscap
- 4445 Ic sendene te nazareth in die stat
 Ic hiet hem dat hi niet en ware lat
 Ende hi marien seide dat
 Dat ic wilde van hare sijn geboren
 Om mijn volc dat ware verloren
- 4450 Dus wildic werden vleeschelijc man
 Ane mine moeder marien dan
 Ende dus quitic mine creaturen
 Daer met. dat wert mi sere te suren
 Die in de helle waren verloren
- 4455 Worden bi marien geboren
 Het en hadde geholpen niet en twint
 En hadde mijn doet daer na niet geint
 Ende vercoren selue mine doet
 Als ic hebbe met groter noet
- 4460 Ende na mine doet hadde verloest
 Mine vriende ende vertroest
 Quade viant nv eist gesciet
 Alsoe als gijt selue siet
 Al en dunket v niet goet
- 4465 Ic hebbe gegeuen vleesch ende bloet

- Mijns selfs lichame om haren wille
 Dus quiticse alle vander hillen
 In derre manieren in derre wijs
 Salic mine vriende int paradijs
 4470 Setten. dat hen es gereet
 Viant al waert di lief ofte leet
 Ic ben saechte suete gemate
 In mi es emmer karitate
 Ic wille nv setten mine vriend
 4475 Die mi wel hebben gedient
 Bouen met mi inden trone
 Sonder inde vele scone
 Quaet viant hebdi gehort
 Wat wildi mi nv seggen vort

 4480 Die duuel seit sint dat gi lijt
 Dat gi sachte here oemoedich sijt
 Quitet mi van desen betteren sere
 Al benic dieuel leue here
 Doe antwerde onse here ihesus
 4485 Quaet du sals enden aldus
 Hier vte en comstu nemmermeer
 Maer blijf in dit bitter seer
 Trecket alle saen achterwert
 Ic hete v dat gi ons niet en deert
 4490 Daer help wenen doet minen wille
 Gaet weder in die wl hille
 Stappans daer ihesus dit hadde geseit
 Elc duuel vliet ende sere screit
 Sie stonden serich ende veruert
 4495 Ende stouen saen ter hellen wert
 Ihesus nam sine vriende te hant
 Elc nam anderen metter hant
 Hi leiddese met hem inden trone
 Singhende alle vele scone
 4500 Daer singhen si noch hoghelike
 Sonder inde euwelike
 Dat wi moeten singhen met hen
 Dies onne ons god segt alle Amen

 dOe quam die sondach vele saen
 4505 Dat ihesus wilde ane gaen
 Dat siin lichame daer hi leit

- Verrees als men dit hadde geseit
 Alsoe siin gheest vander hillen quam
 Daer hi sine vriend vte nam
 4510 Inder dagheraet vele saen
 Doe quam ihesus ghegaen
 Daer sijn lichame lach int graf
 Drie ridderen en scieden niet daer af
 Maer lagen daer gewapent wale
 4515 Datmen den lichame niet en stale
 Die geest nam den groten steen
 Die wit was als yuorenbeen
 Daer met gedect was dat graf
 Den steen dede hi bi siden af
 4520 Siin gheest voer inden lichame dan
 Ihesus wert weder leuende man
 Eer ihesus vten graue geet
 Daer hi in gewonden was dat cleet
 Dat nam hi ende wendet ouer een
 4525 Ende leit gewonden op den steen
 Dit was al inder dagheraet
 Dat ihesus vten graue gaet
 Met vele inghelen hoghelike
 Daer sie wesen ewelike
 4530 Dats die ridderen en wisten twint
 Aldus verrees marien kint

 dOe quamen die marien saen
 Eer die sonne begonst opgaen
 Deen was maria magdalene
 4535 Die vanden sonden was so rene
 Dandere twee die sere scrouwen
 Waren susteren onser vrouwen
 Dese vrouwen brachten salue soete
 Ende wilden saluen ihesus voete
 4540 Ende sine hande ende alle sijn wonden
 Ochsie die gewapende niet en vonden
 Dese marien geselden hen
 Met harre dierre specien
 Ende gaen onblide ten graue voert
 4545 Om die ridderen sere verdoert
 Doen seide der marien ene

Dat was die soete magdalene
 Hoe selen wi den steen bringhen af
 Die so wacht die leit opt graf
 4550 Wy siin wijf van rouwen cranc
 Ende die steen es swaer ende lanc
 Si ghingen voert ic seg v hoe
 Die ridderen vondense slapende doe
 Als magdalene tgraf binnen siet
 4555 Ihesus lichame si niet en siet
 Sie keerde haer omme ende herde screit
 Ende heeft den anderen tween geseit
 Sie suchten alle drie te hant
 Deen nam dandere metter hant
 4560 Sie gingen alle drie saen daer
 Tgraf besien oft ware waer
 Als elke maria tgraf binnen siet
 Si en vondenen daer liggende niet
 Maer een ionghelinc wit ende scone
 4565 Dat was die inghel vanden trone
 Dinghel seit hen ouer waer
 Dat ihesus ware verresen daer
 Ghi vrouwen seit hi en meslaet v niet
 Hebbes bliscap dies ghi hier siet
 4570 ihesuse dien gi sueket nv
 Hi es verresen dat seggic v
 Weset hoghelijc ende blide
 Gi selten sien in corten tide
 Swicht stille ende niet en screit
 4575 Ihesus die in dit graf was geleit
 Hi es worden leuende vander doet
 Inden trone es bliscap groet
 Suede vrouwen en sijt niet veruert
 Keert alle drie achter wert
 4580 Ende doet sinen iongeren maer
 Dat hi verresen es ouerwaer
 Segghet petrem nameleke
 Ende sinte ianne sekerleke
 Sueket sine iongeren algader
 4585 Segt hen dat verresen es haer vader

- Dat si hem troesten ende siin blide
 Si selenne sien in corten tide
 Nu eyst vonden dat es gescreuen
 Ihesus heeft weder ontfaen leuen
 4590 Soete vrouwen ic ben een bode
 Van ihesuse den hogen gode
 Doet mijn gebod ende mine tale
 Keert weder ende doese vele wale
 Als dit dinghel heeft geseit
 4595 Elke maria vele herde screit
 Van bliscapen. si en letten niet
 Si daden dat hen dinghel hiet
 Sie liepen alle drie hoghelike
 Te gadere ende vele sekerlike
 4600 Daer sie dapostolen wisten dan
 Elke loept al dat sie can
 Die soete maria magdalene
 Liep wllike voer dandere allene
 Alsie toten iongeren quamen
 4605 Grote bliscap dat si namen
 Sie riepen vele lude hort alle hort
 Hort alle boedscap die te v behort
 Al wasic wijf besondicht sere
 Ic bringhe nieumare van onsen here
 4610 Ihesus es verresen nv
 Ouer waer soe seggict v
 Ihesus heeft leuen ontfaen
 Hi es verresen sonder waen
 Ic was ten graue al daer hi lach
 4615 Ic en vants niet no en horde no en sach
 Sonder sinen inghel vandic daer
 Diet mi seide al ouer waer
 Dat ihesus leuende worden ware
 Hi hiet mi dat ict v dade mare
 4620 Doe quamen die twee marien saen
 Vele moede daer gegaen
 Ende seiden toten iongeren daer
 Al dat dese vrouwe seit dat was waer

- Heren geloeuet dat dese vrouwe segt
 4625 Int graf daer ihesus was geleg
 Daer en vonden wijs binnen niet
 Daer es grote bliscap gesciet
 Dinghel hiet dat wijt v daden maer
 Dat wijt v seiden oppenbaer
 4630 Ende u peter ende jan
 Dat wijt v seiden nameleke dan
 Dat ihesus ware verresen nv
 Dinghel hiet ons segghen .v.
 Als dit die vrouwen hadden geseit
 4635 Den apostolen ouer waerheit
 Stappans peter ende jan
 Die vore mochte vore ran
 Ende alle de apostolen hant in hant
 Alle gemeyne al te hant
 4640 Alsie daer quamen sie en vonden niet
 Dat cleet dat ihesus daer liet
 Daer hi in was gewonden
 Anderen lichame si niet en vonden
 Elc der iongeren tgraf binnen siet
 4645 Si sagen ouer al si en vonden niet
 Sine vonden lichame el negeen
 Maer dat cleet dat lach opten steen
 Soeten roke als een pument
 Elc iongere dies genoech daer vent
 4650 Als dit algader was gesciet
 Ende sie ihesum en vonden niet
 Sie keerden saen alle achterwert
 Om die ioden waren sie veruert
 Selc was daer die twiuelde sere
 4655 Hoe dus verresen mochte siin onse here
 Hoe hi gelouen soude so saen
 Dien hi ter doet sach verslaen
 Dat was allene sinte thomas
 Die dus in groten twiuel was
 4660 Dandere apostolen en geloefden el niet
 Dan dus met gode was gesciet

Risen ende leuen te sinen wille
Dit geloefden sie lude ende stille
Daer si wech gaen alle gemene
4665 Daer bleef maria magdalene
Suchtende wenende op dat graf
Ende seide si en salre niet sceden af
So en saghe ihesum haren here
Dien wiltsie vleyen ende doen ere
4670 Daer bleefse liggende al in een
Dicwile sach sie inden steen
Oft sie yet saghe si begeerde sere
Ihesum haren lieuen here
Sie viel op deerde si dede haer bede
4675 Suete bedinghe maria dede
Dat sie moeste in corten tide
Ihesum sien ende werden blide
Hoert hier grote minlijchede
Daer maria magdalene dede
4680 Op ihesus graf bleef allene
Die van haren sonden was rene
Daer alle sine apostolen waren
Die alle van vare thuus wert waren
Als maria lach in desen sere
4685 Ende dus wachte ihesum haren here
Hi en lette niet een halue wile dan
So baerde hare een scone man
Die man ihesus vanden trone
Hi quam bloeyende harde scone
4690 Maria wert verueert vele sere
Ende riep vele lude sidi dat lieue here
Die v seluen hebdt verloest
Sidi dat so benic getroest
Sidi dat gheweldich man
4695 Die mi vergaet mine sonden dan
Als ic tot v quam te rade
Sidi dit die mi daet genade
Sidi dit ihesus marien sone

Die gereet sijt altoes te doene
 4700 Elken kerstine vwe genade
 Die op v roept eest vroeck eest spade
 Sidi de ghene die hadt vercoren
 De doet om die waren verloren
 Ende daer met hebt verloest
 4705 Sidi dit gheweldich troest

dOe sprac ihesus maria swich stille
 Ic ben ihesus ic heb de hille
 Te broken. ende verloest mine vrient
 Die mi wilen wel hebben gedient
 4710 Segt minen iongeren dit algader
 Dattu mi sprakes ic ben haer vader
 Ic ben diin god ic ben dijn here
 Mi heefstu begert vele sere
 Maria du waers een sondich wijf
 4715 Nu es met mi so wert dijn lijf
 Dattu mi tierst sages allene
 Soe minnic di suete magdalene
 Ganc ende segt minen vrienden
 Die mi dicke wale dienden
 4720 Segt minen iongheren dit algader
 Dattu mi spraecs Ic ben haer vader
 Segt petrem hem doe ic aflaet
 Van sinen sonden van siere mesdaet
 Dat hi driwerf lochende mijns
 4725 Gisternacht dies hi ontsach sijns
 Segghe dat hem vergheuen si
 Ende dat hi coenlike come te mi
 Maria viel op ihesus voete
 Ende cussese vele soete
 4730 Sie sciet hoghelike saen van gode
 Ende dede wel sine gebode

aLs sie dit geseide waest sondach
 Dat wi nv heten paesdach
 Dat ihesus hem marien baerde
 4735 Dat si sijn oprisenesse maerde

Sinen apostolen na ende wide
 Die boec ghebiet dat wi sijn blide
 Dien daghe selen wi met recht doen ere
 Daer in dus verrees onse here

- 4740 Ihesus onse here van paradijs
 Baerde hem saen in menegher wijs
 Sinen apostolen sinen vrienden
 Die hem vleiden ende dienden
 Die oetmoedeghe here en leet niet lanc
- 4745 Met hen at hi ende dranc
 Met hen was hi soete ende sachte
 xl. daghe ende xl. nachte
 Als leden waren xl. daghe
 Ihesus onse here quam tsinen magen
- 4750 Te bethanie oetmoedelike
 sDonderdaechs in die cruce weke
 Daer hi met sinen iongheren sat
 Ende met hen dranc ende at
 Met siere hant hise benedide
- 4755 Ende predicte hen ende makese blide
 Stappans als hi dit hadde ghedaen
 Si staen vander tafelen saen
 Si en waren niet te sat in scine
 Noch oec dronken van sterken wine
- 4760 Si daden daer toe al haren sen
 Ter tafelen dat ihesus seide hen
 Ihesus nemt orlof vele scone
 Want hi wilt varen inden trone
 Daer sine iongheren ieghewerdich waren
- 4765 Ene claeheit begonde baren
 Ene wolke quam onder hen daer
 Die soe scone was ende so clae
 Die wolke gaf so claren scijn
 Hen wonderde wat dat mochte sijn
- 4770 Metter claeheit voer vele scone
 Ihesus onse here inden hoghen trone
 Daer die claeheit ihesum draecht
 Elc die daer was met oeghen saecht
 Als onse here quam toten trone
- 4775 Daer die inghele in sijn scone
 Alle dinghele die daer waren

- Quamen ieghen hem gheuaren
 En songhen alle blidelike aldus
 Sanctus sanctus sanctus dominus
 4780 Daer es noch die here van hemelrike
 Ende sal wesen ewelike
 Dat weet hi al dat men doet
 Eer ment gepenst eyst quaet eist goet
 Daer sal hi sitten tot di male
 4785 Clare blide scone ende wale
 Dat hi hier tale tot ons sal comen
 Elken na sine werke doemen
 Het en es pape no leec no wijf no man
 Die de wile seggen can
 4790 Die nie in boeke gescreuen sach
 Weltijt het sal wesen doemsdach
 Maer sonder twiuel die dach sal comen
 Dat ihesus ons allen sal doemen
 Hi sal comen als god ende here
 4795 Dan selen wi ons vruchten sere
 Als dit sal siin selen wi beuen
 Ende dingle oec het es gescreuen
 Daer sal hi leeken ende clerken
 Elken lonen van sinen werken
 4800 Dat tonghe ne geene geseggen mach
 Hoe gruelijc sal wesen doemsdach
 Al dat es sal dan beuen sware
 Dan sal vallen sonne ende mane
 Alle die siin leuende ofte doet
 4805 Selen risen ende siin te derre noet
 Ieghen dat si hier hebben gedaen
 Selen sie daer den loen ontfaen
 Daer comen in derre wijs
 Onse here van paradijs
 4810 Als hi anden cruce stont
 Ende sal ons doen cont
 Wat hi doechde doer onsen wille
 Van vruchte selen wi swigen stille
 Dan sal ihesus van paradijs
 4815 Ten sonderen seggen in derre wijs
 Hort na mi vele quade honde
 Die vonden sijt in hoeftsonde

Gaet van mi int ewelike vier
 In dien stanc in dat wle ondier
 4820 Hebt dat torment ewelike
 Quade serpente iammerlike
 Gaet vollike in dat bitter seer
 Ende woenet daer in emmermeer
 Gaet te dien draken in die hille
 4825 Daer gi emmer selt in quellen
 Gaet caytiue sondeghe zielen
 In dat pec wallen ende wielen
 Sijt daer ewelike seit onse here
 Hij sal die worpen in desen sere
 4830 Die ieghen hem hebben mesdaen
 Die te rade niet en sijn gegaen
 Die hier doen sinen onwille
 Si selen berren in die hille
 Dat seit die boec al oppenbaer
 4835 Ic wilt oec segghen ouer waer
 Dat elc lichame metter sielen sine
 Sal barren in die helsche pine
 Hierom souden wi onsen vader
 Dienen ende vleien alle gader
 4840 Die wile dat wi siin in desen liue
 Dat wi niet en werden caytiue
 Dies moete wi alle verdienen hier
 Dat ons bescermt moet sijn dat vier
 Ende dat torment ende alle die sere
 4845 Dies moete ons onnen onse here

 dAn sal ihesus te siere rechter hant
 Die saleghen setten al te hant
 Ende sal segghen. ghebenedide
 Mine kinder weest alle blide
 4850 Ende sal op heffen sine hant
 Ende salse segghenen al te hant
 Dan sal hi segghen lieue vrient
 Mi hebdi oeyt wel ghedient
 Ic wille v leiden vele scone
 4855 Met mi bouen inden trone

Ghi waket dicke om minen wille
 Mi daeddi eere lude ende stille
 Ghi saecht gerne minen bode
 Gi hielt vele wel mine gebode
 4860 Gi ghinct ter kerken vroeck ende spade
 Gi ginct ten pape dicke te rade
 Ter goedertijt waerdi geboren
 Met mi so sidi alle vercoren
 Mine kinder gebenedide
 4865 Gi horet gherne al v getide
 Den armen stondi dicke bi
 Dat gi hen daet dat daeddi mi
 Gi waert oetmoedich ende gemate
 Gi hadt trouwe ende caritate
 4870 In v was trouwe in alle tijt
 Daer om willic dat gi sijt
 Sonder inde int eusche rike
 Hier bouen in mijn hemelrike
 Siele ende lichame willic dat si
 4875 Int hoghe paradijs met mi
 Daer es die bliscap emmer groet
 Daer es dat lijf sonder doet
 Daer en wert men nemmer out
 Daer singhen dingle menichfout
 4880 Daer en es rouwe noch oec seer
 Daer es men blide emmermeer
 Daer en eist te heet no te cout
 Daer es bliscap menichfout
 Die willic dat v gereet si
 4885 Daer willic v allen setten bi mi
 Daer heeft elke ziele haren wille
 Daer en swijcht men nemmer stille
 Daer singt men emmer aldus
 Sanctus sanctus sanctus dominus
 4890 Lieue kinder daer willic v
 Setten an mine side nv
 Daer sal v lichame ende v siele
 Ewelike singhen met sinte machiele

In derre manieren in derre wijs
 4895 Sal onse here van paradijs
 Te doemsdaghe tote ons comen
 Na sine gewerke elken doemen
 Daer moeten wi redene geuen saen
 Van dien dat wi hebben gedaen
 4900 Nu moeten wi dan die ghewerke
 Doen. man ende wijf. leec ende clerke
 Dat wi moeten siin met hem
 Ewelike in dat hoghe iherusalem

IC wille v segghen ouer waer
 4905 Sekerlike ende oppenbaer
 Soe waer vrouwe in arbeite geet
 Ende sie desen boec int huus weet
 Heefsij's geloeue sonder waen
 Si sal saechte hebben saen
 4910 Ende die vrucht die sie bringen sal
 Sal siin rechinghe hebben al
 Soe wie oec geloue heeft des
 Soe wat huse daer dese boec in es
 Daer en mach tempeest no plage
 4915 Slaen. no bi nachte no bi daghe
 Oec es dit waer godweit
 Int huus daer dese boec in leit
 Soe wie daer binnen es
 Sijt dies seker ende ghewes
 4920 Dat nemmer en versterft
 Haestelinghe no en bederft
 Ende alle die ghene die gode minnen
 Ende hier toe legghen hare sinne
 Diere eerst toe legt eist man eist wijf
 4925 God gheue hen allen ewelijc lijf
 Ende die clerck die dese rime maecte
 Dier om pensde ende waecte
 Ende de ghene die screef dit werck
 Was hi pape was hi clerck
 4930 Gode ende onser vrouwen teeren

Datter tfolc an moeste leeren
Sonder inde moeten hare sielen
Metten inghel sinte michele
Rusten inden hoghen trone
4935 Met allen heylighen vele scone
Onser alre zielen oec met hen
Sprect alle te gader Amen

.Deo gratias.

Gode segghen wi lof.
Ende den hemelschen here daer of

Dit was gheint in jaersauende toetinghen.
Int jaer ons heren als men screef M. CCCC. ende xxxviiij.